

EXERCITATIO THEOLOGICA INAUGURALIS,
DE
VANA SPE REGNI
CHILIASTICI,
SUB FINEM MUNDI IN HIS
TERRIS CERTO EX-
PECTANDI,

Dicto Apoc. XX. v. 1-7. nixâ,

QUAM

INDULTU

SUMME REVERENDÆ FACULTATIS
THEOLOGICÆ

IN ACADEMIA LIPSIENSI,

PRO LICENTIA

SUMMOS IN THEOLOGIA HONORES
CONSEQUENDI,

Diebus XX & XXI. October. Anno M DCC XXIII.

PUBLICO EXAMINI SUBJICIET

M. FRIDERICUS WERNERUS,

SS. Theol. Baccal. ad D. Nicolai Diaconus.

L I P S I Æ,

Litteris SCHOLVINIANIS.

58700(7)



VIRIS

**MAGNIFICIS, NOBILISSIMIS, AMPLIS-
SIMIS, CONSULTISSIMIS ATQUE
PRUDENTISSIMIS,**

DOMINIS

CONSULIBUS,

PRO-CONSULIBUS,

ÆDILIBUS,

PRÆTORIBUS,

TOTIQUE ORDINI SENATORIO

INCLYTÆ

REIPUBLICÆ LIPSIENSIS

GRAVISSIMO,

*DOMINIS PROMOTORIBUS
ac PATRONIS*

OMNI OBSERVANTIÆ CULTU DEVENERANDIS,

**HANC PRO LICENTIA DISPUTATIONEM,
CUM VOTO OMNIGENÆ PROSPERITATIS,
DICO atque DEDICO.**



*Ulla mihi apologia opus esse
censeo, quod in conspectum
vestrum, PATRONI MA-
XIMI, jam prodiens hanc
dissertationem inauguralem*

*Vobis offeram, & insuper inclytis Vestris
Nominibus inscribam, cum causas habeam
graves atque prægnantes. Quis enim adeo
hospes in hac urbe est, quem lateat, quanta
beneficia à VOBIS mihi exhibita sint? Quo
omnia alia silentio præteream, cum ista hic
singulariter recensere non audeam, pauca
tantum impræsentiarum proferam. Vigesi-
mus quintus nunc volvitur annus, ex quo
me*

me extraneum in ecclesiæ vineam, divina
directione moti, vocastis: & quidem pri-
mo in novo templo conciones vespertinas
mibi concredidistis, post annos quindecim
in Æde Thomana meridionales, sexennio
vero integro elapso & paulo eo plus, mihi in
templum Nicolaitanum translato, matuti-
nas conciones die veneris habendas, sine
ulla mea sollicitatione commisistis. Hæc
mibi exhibita beneficia in mentem alte re-
posui, ut nullo tempore in me sint intermo-
ritura. Hactenus tantum sollicitus fui,
quomodo pro hoc singulari, ac vere pater-
no erga me affectu, meam gratam mentem
declarare possem, quo meæ erga Vos, PA-
TRONI MAXIMI, gratitudinis & ob-
servantiæ publicum extaret testimonium.
Nunc, opportuna occasione se offerente,
meam disputationem pro Licentia Vobis,
PROMOTORIBUS AC PATRONIS
meis, consecrare ausus sum, non dubitans,
quin hoc vile observantiæ pignus serena

fronte accepturi, bonamque in partem interpretaturi sitis. DEUM autem ter Optimum Maximum calidissimis veneror precibus, ut totum Amplissimum Ordinem Senatorium per multum temporis spatium sospitem atque incolumem servet, omnibenedictionis genere cumulet, omnibus quoque prudentissimis illius consiliis ex alto ita adspiret, ut ecclesiæ pariter ac Reipublicæ nullo non tempore sint salutaria!

**MAGNIFICORUM AMPLIS-
SIMORUMQUE NOMINUM
VESTRORUM**

Cultor observantissimus

M. FRIDERICUS WERNERUS.

Σὺν τῷ Θεῷ!

P R Æ F A M E N.



Solius DEI omniscii & omnisapientis esse interpretari visiones, somnia & alia Scripturæ Sacrae abstrusa loca, quis inficias ire potest, cum etiam Josephus hoc fateatur? Gen. XL. v. 8. Licet quis mediis hermenevticis Scripturam Sacram interpretandi sit instructus, attamen omnis ejus conatus verum sensum monstrandi in vanum abit, nisi Deus mentem interpretis lumine suo illustret. *Ipse enim revelat profunda & abscondita, & novit, quid in tenebris, & lux cum eo habitat.* Dan. II. v. 22. Hinc Daniel & socii ejus a Deo coelorum petebant, ut arcanum, a Rege Nebucadnezare postulatum, manifestaret & aperiret. Immo Daniel, non esse sapientum arcana indicare, sed solum Deum in coelis abstrusa revelare, & futura notificare posse v. 27. 28. regi monstrat. Inter Scripturæ Sacrae

cræ obscura loca etiam noster textus Apocalypticus
vexatissimus est referendus, in cuius interpretatione
multi hallucinati sunt. Ante complementum visio-
nes rite interpretari, eorumque genuinum sensum a
DEO intentum aperire, est res valde ardua, imo di-
vina. Irenæus scribit libr. 4. advers. hæres. cap. 43.
*Omnis prophetia, priusquam compleatur, ænigma est: cum autem im-
pleta est, manifestam habet expositionem & intelligentiam.* Cum
igitur allegata visio Johannæa quoque sit talis textus,
qui perfectum complementum nondum consecutus
est; itaque solus DEUS exegetæ ope sua verum sen-
sum patefacere, & quid in hac visione præfiguraverit,
aperire potest. Hac quoque Spiritus Sancti assisten-
tia freti, [cum in hoc textu visionali, propter Chiliaſtas
& alios Novatores explanando, nullum alium scopum
præfixum habeamus, nisi GLORIAM DEI & veritatis
divinæ indagationem,] simulque divina promissione
Dan. XII, v. 4. nixi, DEUM TER OPTIMUM MAXI-
MUM calidissimis veneramur precibus, velit intellectum
nostrum suo gratioso lumine collustrare, quo verum ab
ipso intentum sensum assequatur & penetret, volunta-
tem quoque ad assensum flectere, quo in reperto sensu
genuino acquiescat. Faxit DEUS per CHRISTUM
DOMINUM nostrum, in Virtute Spiritus
Sancti! Amen.



TEXTUS AVTHENTICUS.

APOCAL, XX. v. 1-7.

ΚΑΙ εἶδον ἄγγελον καταβαίνοντα ἐκ τοῦ θράνου, ἔχοντα τὴν κλεῖδα τῆς ἀβύσσου, καὶ ἄλυσιν μεγάλην ἐπὶ τὴν χεῖρα αὐτοῦ.

2. Καὶ ἐκράτησε τὸν δράκοντα, τὸν ὄφιν τὸν ἀρχαῖον, ὅς ἐστι διάβολος καὶ σατανᾶς, καὶ ἔδησεν αὐτὸν χίλια ἔτη.

3. Καὶ ἔβαλεν αὐτὸν εἰς τὴν ἄβυσσον, καὶ ἐκλείσεν αὐτόν, καὶ ἐσφράγισεν ἐπάνω αὐτοῦ, ἵνα μὴ πλανήσῃ, τὰ ἔθνη ἔτι, ἄχρι τελεοθῇ τὰ χίλια ἔτη. Καὶ μετὰ ταῦτα δεῖ αὐτὸν λυθῆναι μικρὸν χρόνον.

4. Καὶ εἶδον θρόνους, καὶ ἐκάθισαν ἐπ' αὐτοὺς, καὶ κρίμα ἐδόθη αὐτοῖς. Καὶ τὰς ψυχὰς τῶν πεπελεκισμένων διὰ τὴν μαρτυρίαν Ἰησοῦ, καὶ διὰ τὸν λόγον τοῦ Θεοῦ, καὶ οἵτινες ἔπροσεκύνησαν τῷ θηρίῳ, ἕτε τῇ εἰκόνι αὐτοῦ, καὶ ἔκλαβον τὸ χάραγμα ἐπὶ τὸ μέτωπον αὐτῶν, καὶ ἐπὶ τὴν χεῖρα αὐτῶν. Καὶ ἔζησαν, καὶ ἐβασίλευσαν μετὰ χριστοῦ τὰ χίλια ἔτη.

5. Οἱ δὲ λοιποὶ τῶν νεκρῶν ἔκἀνέζησαν, ἕως τελεοθῇ τὰ χίλια ἔτη. Αὕτη ἡ ἀνάστασις ἡ πρώτη.

6. Μακάριοι καὶ ἅγιοι ὁ ἔχων μέρος ἐν τῇ ἀναστάσει τῇ πρώτῃ· ἐπὶ τῶν τέτων ὁ θάνατος ὁ δεύτερος ἔκ ἔχει ἐξουσίαν, ἀλλ' ἐσονται ἱερεῖς τοῦ Θεοῦ, καὶ τοῦ Χριστοῦ, καὶ βασιλεύσουσι μετ' αὐτοῦ χίλια ἔτη.

Versio Vulgata.

ET vidi angelum descendentem de coelo, habentem clavem abyssi, & catenam magnam in manu sua.

Et apprehendit draconem serpentem antiquum, qui est diabolus & Satanas, & ligavit eum per annos mille.

Et misit eum in abyssum, & clausit & signavit super illum, ut non seducat amplius gentes, donec consummentur mille anni: & post hæc oportet illum solvi modico tempore.

Et vidi sedes, & sederunt super eas, & iudicium datum est illis, & animas decollatorum propter testimonium JESU, & propter verbum DEI, & qui non adoraverunt bestiam, neque imaginem ejus, nec acceperunt characterem ejus, in frontibus aut in manibus suis, & vixerunt & regnaverunt cum Christo mille annis.

Cæteri mortuorum non vixerunt, donec consummentur mille anni. Hæc est resurrectio prima.

Beatus & sanctus, qui habet partem in resurrectione prima: In his secunda mors non habet potestatem, sed erunt Sacerdotes DEI & Christi: & regnabunt cum illo mille annis.

Verfio B. Lutheri.

1. **S**ah ich sahe einen Engel von Himmel fahren, der hatte den Schlüssel zum Abgrund und eine grosse Kette in seiner Hand.

2. Und er grieff den Drachen, die alte Schlange, welche ist der Teuffel und der Satan, und band ihn tausend Jahr.

3. Und warff ihn in den Abgrund, und verschloß ihn, und versiegelte oben darauff, daß er nicht mehr verführen solt die Heyden, bis daß vollendet würden tausend Jahr, und darnach muß er loß werden eine kleine Zeit.

4. Und ich sahe Stühle, und sie saßen sich drauff, und ihnen ward gegeben das Gerichte, und die Seelen der Enthaupten, um des Zeugnis JESU, und um des Worts Gottes willen, und die nicht angebetet hatten das Thier, noch sein Bild, und nicht genommen hatten sein Mahlzeichen an ihre Stirn, und auf ihre Hand, diese lebeten und regierten mit Christo tausend Jahr.

5. Die andern Todten aber wurden nicht wieder lebendig, bis daß tausend Jahr vollendet wurden. Diß ist die erste Auferstehung.

6. Selig ist der und heilig, der Theil hat an der ersten Auferstehung, über solche hat der andere Tod keine Macht, sondern sie werden Priester Gottes und Christi seyn, und mit ihm regieren tausend Jahr.

CAPUT I.
HISTORICUM.*De Chiliasmo.*

§. 1.



Oculus noster Apocalypticus quasi commune chiliasstarum asylum est, ad quod in regno suo chiliasstico stabiliendo, tanquam ad sacram anchoram, recurrere solent, hoc dicto ad palliandos errores suos temere abutentes. Licet chiliasstæ ad errorem suum de regno chiliasstico confirmandum ad alia quoque scripturæ dicta provocent, attamen nullus locus illis magis arridet, quam hic Apocalypticus quasi palmarius. Hinc nonnulli in primitiva ecclesia Apocalypsin Johannis, an sit scriptum θεόπνευστον, olim in dubium vocarunt, aut penitus repudiarunt, teste Dionysio Alexandrino apud Eusebium H. E. L. VII. Cap. XXV. cum caput præsertim vigesimum somniis ac sigmentis Chiliasstarum ac Fanaticorum patrocinari videretur, propter obscuritatem quoque a nemine intelligi posset. Ast hoc non per se, sed per accidens fit, si verus ac genuinus sensus hujus textus a multis non investigatur. Sol sane propterea non est obscurus, quia oculi vespertilionum ad ipsius lumen cœcutiunt. Sic vitium quoque non in ipsa Scriptura Sacra, sed in caliginosa mente hominis, principiis hermenevticis præsertim destituti, reperitur. Si quoque hoc vaticinium Johannæum propter obscuritatem, cum chiliasstæ occasionem illud ad sinistrum sensum detorquendi lascivia humani ingenii sumant, rejiciendum sit, sequitur, multa vaticinia & alia scripturæ loca, primo intuitu obscura, haud esse recipienda, quoniam hæretici illa velex malitia, vel ex ignorantia in alienum sensum a Spiritu Sancto haud intentum rapere soliti sunt. Si etiam hic liber, simul cum hoc textu, plane non intelligi potest, cur dicitur ἀποκάλυψις, rei abstrusæ manifestationem, a solo Deo dependentem, Dan. II. v. 22. significans? Cur Johannes Christianos ad Apocalypsin, a se scriptam, scrutandam remittit dicens: *Beatus, qui legit, & qui audiunt verba prophetie, & qui tenent, quæ in illa scripta.* Cap. I. v. 3. Multo magis in hujus textus aliquo modo obscuri genuinum sensum divinitus intentum diligenter inquirendum, istoque reperto, a chiliasstarum corruptelis est vindicandus, ne hoc textu ad errorem suum de mundano regno Christi ficto palliandum amplius abutantur.

§. 2.

Chiliasstæ & Chiliasmus origine græca sunt vocabula, nomenque ἀπὸ τῆς

χιλιάς seu a millenario habent, hinc chiliaſtæ ab Iſidoro Millenarii, & ab Auguſtino milliaſtæ & milliarii dicuntur, quia χίλια ἔτι ſeu mille annos, quorum Apoc. XX. mentio fit, de novo regno mundano, a Chriſto in his terris ante extremum diem inchoando, variis deliciis repleto, milleque per annos duraturo, falſo exponunt. Sed Chiliaſtæ alique Fanatici dicto Apocalyptico nixi, ſpē regni Chiliaſtici, ſub finem mundi certo futuri, falluntur, aliosque fallunt. Hoc loco quidem, Johannem de mille annis, in quibus Satanas ligari debet, ne gentes amplius ſeducat, loqui percipimus, aſſi non de mundano, ac omni felicitate repleto Chiliaſtarum regno & aureo ſeculo, utpote quod in hoc Capite XX. non fundatum, ſed tantum in Fanaticorum cerebro natum eſt. Huic regno Chiliaſtarum A. C. in art. XVII. contradicit, ubi verba ita ſonant: *damnant & alios, qui nunc ſpargunt Judaicas opiniones, quod ante reſurrectionem mortuorum, pii regnum mundi occupaturi ſint, ubique oppreſſis impiis.*

§. 3.

Primam itaque originem Chiliaſmus e Judaicis fabulis, in eorum libris contentis, duxit, dum Judæi ante adventum Chriſti in carnem ſibi mundanum quoque regnum de Meſſia ſuo imaginati ſunt. Hodierni Judæi, Meſſiam adhuc expectantes, pari modo nullum aliud, niſi mundanum regnum, adveniente Meſſia, ſibi pollicentur, fingentes, Meſſiam mundanum regem Patriarchas, Prophetas aliosque Judæos mortuos reſuſcitaturum, in terram Canaan introducturum, urbem templumque Hieroſolymitanum inſtauraturum, omnia ethnicorum regna ſibi bello ſubjecturum, delicatiſſimis cibis ac potibus populum ſuum repleturum, & inſtar aliorum Monarcharum in his terris regnaturum. Ejusmodi Judæorum ſomnia plura de mundano Meſſiæ regno voluptuoſo ex Talmude & aliis ſcriptis Rabbinicis recenſet B. Joh. Müllerus in ſuo Judaismo pag. 863. ſeqq. Geron quoque, Judæus converſus, magno de convivio a Meſſia inſtituendo, inque Talmude deſcripto, in ejus refutatione Cap. XVI. Part. I. pag. 113. ſeqq. refert, Meſſiam, Judæis in terram ſanctam introductis, ſuper aureis menſis bovem magnum, nomine Behemoth, piſcem eximie magnitudinis Leviathan, magnam avem Bar Juchna, delicatum ac millenarium vinum, quod in Paradifo creverit, inque vinaria cella Adami adhuc reſervaretur &c. appoſiturum, illosque vario modo exhilaraturum eſſe. Vide plura de hoc convivio & regno voluptatibus pleno, a Meſſia inſtituendo, in Buxt. Synag. Jud. cap. L. pag. 734. ſeqq. Ejusmodi fabulis Judaicis omnino regni Chiliaſtici fundamenta jacta ſunt, & ex his Judæorum ſomniis Chiliaſmus enatus eſt, non ſolum craſſus, ſed & ſubtilis, dum hunc quoque judaicam fuiſſe opinionem, ac diſcrimen Chiliaſmi craſſi & ſubtilis in Judæorum ſcholis viguiſſe, ſolide oſtendit B. Carpzovius in Progr. Paſſ. ad an. 1691.

§. 4.

In N. T. ecclesia prius Chiliaſtici erroris, ut & multorum aliorum, quos in eccleſiam introducere conatus eſt, autor fuiſſe traditur Cerinthus hæreticus. Cerinthus natione Judæus, a Judaismo quidem ad Chriſtianismum tranſiens, at tamen Semi-Judæus manens, eccleſiam Chriſti in Aſia vario modo turbavit, ac Syncretiſmum inter Chriſtianismum ac Judaismum molitus. Poſtquam enim nomen ſuum Chriſtianismo dederat, hæreſes ſuas contra verbum DEI excogitatas in eccleſiis Aſiæ ſpargebat, Chriſti divinitatem negabat, illumque nudum hominem, ac ex congressu maritali genitum eſſe, blaſphemabat. Et cum Cerinthus, uti ex Auguſt. de hæreſ. cap. 8. conſtat, Semi-Judæus fuerit, circumciſionis ac Sabbathi Judaici obſervationem eſſe neceſſariam, regnumque Meſſiæ ſed mundanum, per mille annos duraturum, aſſeruit. Hinc in propatulo eſt, Cerinthum Iudaizantem ex fabulis ac ſomniis Judæorum de mundano Meſſiæ regno doctrinam de Chiliaſmo, occasione Apoc. cap. XX. quem locum ad ſiniſtrum detorſit ſenſum, hauſiſſe, ac ſequentibus temporibus ubique inter Chriſtianos divulgari. Cerinthus ejusque aſſecclæ, Cerinthiani a Cerintho dicti, Chriſtum ante diem noviſſimum e cœlo viſibiliter in terram rediturum, pios e mortuis excitaturum, omnibus impiis oppreſſis, regnum terrenum inchoaturum, inque illo reſuſcitatos ac ſuperſtites pios corporalibus deliciis per mille annos in his terris repleturum, variisq; modis usque ad univerſalem mortuorum reſurrectionem reſecturum, uti hiſtoriæ teſtantur, ſtatuebant. Eusebius libr. 7. Hiſt. Eccl. cap. XXV. Cerinthi hæreſin ita deſcribit: *Cerinthus hæreſis illius, quam Cerinthianam vocant, conditor docuit, regnum Chriſti fore terrenum, & quæ ipſe tanquam corporis ſui ſtudioſus, & vehementer carnalis concupiverat, in illis ſe futurum ſomniauit, ventris videlicet, & eorum, quæ ventri ſubſunt, ſaturationibus, cibis nempe ac potibus & nuptiis, & quibus iſta majore cum jucunditate acquirenda putavit; diebus feſtis, victimis ac ſacrificiorum maſtationibus.* Auguſt. libr. de hæreſ. cap. 8. ſcribit: *Cerinthiani, a Cerintho dicti, mille annos poſt reſurrectionem in terreno regno Chriſti, ſecundum carnales ventris & libidinis voluptates, futuros fabulantur, unde etiam Chiliaſta ſunt appellati.* vide B. Gerh. L. Theol. Tom. IX. de Conſumm. ſeculi, cap. 7. §. 67. pag. 443. Quis ſic dubitare poteſt, Cerinthum Hæreſiarcham Chiliaſtarum Proavum fuiſſe, ac Chiliaſticas opiniones in N. T. eccleſiam primo introduxiſſe?

§. 5.

Verum enim vero Chiliaſmus cum Cerintho hæreſiarcha non ſepultus fuit, ſed ſuo errore Chiliaſtico nonnullos eccleſiæ Patres, græcos ac latinos, Chiliaſmum Cerinthi ex parte amplectentes, infecit. Sicuti enim hæreſis aliqua ceu

gangræna pastum habet 2. Tim. II. v. 17. & unus error, ab uno saltem autore haustus, ad quam plurimos emanat; ita quoque error Chiliasticus, a primo autore Cerintho profectus, orientem & occidentem pervasit, seque latissime diffudit. Papias Episcopus Hieropolitanus primus inter patres ecclesiæ, juxta testimonium Euseb. libr. 3. Hist. Eccl. cap. 39. & Niceph. libr. 3. Hist. Eccl. cap. 20. censetur opinione Chiliastica infectus, qui hanc ubique disseminavit, jactitans, regnum millenarium ex viva Apostolorum traditione ad se delatum fuisse: hinc aliis ecclesiæ doctoribus ejusdem erroris, illum ceu Apostolicam traditionem aspicientibus, causam dedit. Et cum hæc opinio prima fronte speciosa videretur, hinc nonnulli antiquissimi ecclesiæ patres istam, cap. XX. Johannis non recte intelligentes, amplexi sunt, v. gr. Justinus, Irenæus, Apollinarius, Tertullianus, Lactantius & alii, uti B. Gerhardus, quod errori Chiliastico addicti fuerint, ex historia ecclesiastica prolixè confirmat in L. Theol. Tom. IX. de consumm. seculi, cap. 7. pag. 445. seqq. It. Thumm. in impiet. Weigel. p. 319. seqq. Et Pfeiff. in Anti-Chil. pag. 94. seqq. Quanquam quidem nonnulli ecclesiæ doctores Chiliasticæ opinioni applauserunt, tamen vix credi potest, illos Cerinthi formia ac Chiliafinum crassum de voluptatibus carnalibus in hoc mundo sperandis, sed potius subtilem de spiritualibus, fuisse amplexos. Licet quoque nonnulli patrum ad corporis delicias simul respexerint, non tamen carnales ac illicitas, sed Christiano dignas, indigitarunt. Hinc Dn. Affelmannus in Syntagm. Exerc. Acad. part. I. Disput. 3. quæst. 6. pag. 49. dicit: August. libr. 20. de Civit. Dei cap. 7. *Patrum opinionem vocat tolerabilem, si, quæ Cerinthus de corporalibus deliciis dixit, de spiritualibus acceperimus, ac se quoque aliquando illud fuisse opinatum, scribit.* Ubi observa, quod Augustinus spiritualium deliciarum nomine, opinionem patrum a Cerinthi hæresi distinguit: quo & pertinet, quod Irenæus, licet Chiliastarum opinionem tueatur, in Cerinthum tamen libr. I. adversus hæreses cap. 25. propter illa dogmata, stylum stringat.

§. 6.

Quamvis autem postea per mille ferme annos de Chiliafimo altum in Ecclesia fuerit silentium, attamen Anabaptistæ eorumque asseclæ hunc errorem ex orco quasi revocantes, denuo in ecclesiam introduxerunt, vide Sleid. libr. 10. quos A. C. art. XVII. primario refutat. Horum vestigia, si non in totum, tamen ex parte premunt Sociniani, Arminiani, Weigeliani ac nonnulli Papistæ & Calviniani, vide Gerh. in L. Th. supra citatis, & Quenst. in System. Theol. part. 4. cap. 20. pag. 649. seqq. Chiliastarum opinionem hodie Enthusiastæ, Fanatici, Quackeri & alii novatores ex parte amplectuntur. Sed de Regno Chiliastico non est omnium eadem opinio, quia nonnulli Chiliafimo crasso, nonnulli subtili adstipulantur.

pulantur. Chiliaſmum craſſum tuentes ſomniant, regnum a Chriſto ante extremum diem & univerſalem mortuorum reſurrectionem, in his terris inchoandum, fore terrenum, omnibusque voluptatibus corporalibus ac mundanis reſertum, perque mille annos duraturum. Chiliaſmo ſubtili addicti regnum quidem mundanum & aureum ſeculum ſtatuunt, ſed in quo ſumma pacē ac perfectā juſtitia pii per mille annos fruituri, talemque ſtatum, qualis ante Adami lapſum fuerit, poſſeſſuri ſint. Interim ſubtiles quoque Chiliaſtæ inter ſe haud conveniunt, ſed diverſas de regno millenario ſovent opiniones. vide L. Th. Gerh. ſupra citatos, ibid. pag. 462. 463. Dn. Affelmannus in Syntagm. Academ. Exercit. part. 1. diſput. 2. quæſt. 6. pag. 52. 53. quinque diverſas Chiliaſtarum ſententias refert. Dn. Neumannus in diſp. de Chiliaſm. ſubtiliſſ. Witteb. 1694. habita, Chiliaſmum in craſſum, ſubtilem & ſubtiliſſimum diſpeſcens, craſſum Cerintho ac Cerinthianis, ſubtilem a Papia proſectum nonnullis orthodoxis eccleſiæ patribus, ſubtiliſſimum modernis quibusdam novatoribus adſcribit. Dn. Fechtius in Lect. Theol. in Syllogen diſp. 1. pag. 9. & 10. hujus triplicis Chiliaſmi, & in ſpecie ſubtiliſſimi pari modo mentionem facit. Vide quoque Dn. Fechtii diſp. de Chil. ſubtili Roſtoch. 1693. habitam. Cum autem omnes Chiliaſmum craſſum, ſubtilem vel ſubtiliſſimum propugnantes, in opinione ſua fulcienda, ad textum noſtrum Johannæum, tanquam primarium de regno Chriſti millenario agens vaticinium, provocent, itaque in iſto poſtea rite explicando, plane nullum ejusmodi Chiliaſmum exinde ſtabiliri poſſe, oſtendemus.

CAPUT II.

D I D A C T I C U M.

De genuino modo ad verum ſenſum myſticum, præſertim in viſionibus, perveniendi.

§. I.

CUm omnes Chiliaſmi, qualis etiam ſit, propugnatores, opinionis ſuæ Chiliaſticæ aſylum in Scriptura S. hodie quærentes, capite XX. Johannis male intellecto nitantur, hinc neceſſitas eſſagitatur, ut ejus verus ac myſticus, a Deo Johanni certam per viſionem repræſentatus ſenſus, aperiatur & indicetur, ne hoc textu amplius abutantur. Senſus autem Scripturæ eſt duplex, literalis ac myſticus. Literalis eſt, qui proxime ac immediate per ipſa verba, ſive ſint propria, ſive figurata, ſignificatur, & ab ipſo Spiritu S. intenditur. Myſticus vero eſt is, qui non proxime & immediate per ipſa verba indicatur, ſed per res ipſas, mediante ſenſu literali, a Spiritu Sancto intenditur. Hinc in utroque ſenſu vero inveſtigando

gando, quo exegeta divinum & a DEO, autore scripturæ primario, sive per verba, sive per res in ista intentum, assequatur, omnis opera est adhibenda; alias loco verbi divini humanum tradit, hinc Hieronymus dicit: *Verbum DEI male intellectum non est verbum DEI, sed humanum.*

§. 2.

Sensum divinum indagandi cupidus in sacrum textum, illum juxta sonum verborum solummodo considerando, haud imprudenter ruat, licet neque sensus neque scopus ipsi cognitus: tantum enim abest, ut officio boni interpretis fungatur, ut potius in scriptura explicanda oleum & operam perdat. Sed exegeta ante omnia ad primarium dicentis scopum respiciens, thema principale in textu contentum eruere, ordinem, connexionem ac partes illius inquirere, argumenta in isto latentia vi logices enucleare, ac rationes probandi bene examinare necesse habet, quo, adhibitis principiis hermenevticis, hunc vel illum dicti Biblici, electum sensum, nullumque alium esse divinum, certus sit. Inter hermenevtica principia est præcipuum, si thema e textu extractum, ac menti sacri scriptoris respondens, in Subjectum & Prædicatum, ac utrumque in circumstantias homogeneas distribuatur, quam resolutionem plerique interpretes exegeti textus non præmittunt, sed negligunt, & propterea sæpe a vero sensu ac scopo dicentis aberrant. Falsa enim scripturæ explicatio vel ex ignorantia, vel negligeutia, vel malitia hominum proficiscitur, cum interpretes media hermenevtica vel plane ignorant, vel negligunt, vel non iuste, sed male applicant. Veteres Rabbini itaque dixerunt: *in quocunque loco scripturæ invenis pro hæreticis objectionem, invenies quoque in latere ejus medicamentum seu responsionem.* Hinc summe necessarium est, ut exegeta, scripturam intelligendi cupidus, e sacro textu thema adæquatum ac menti divinæ respondens hauriat, atque partes ejus bene perpendat, ne in electione certæ sententiæ hallucinetur, & in dicti Biblici interpretatione vero a tramite aberret. Quis alias de vero sensu inter varias autorum sententias, neglecta textus ac contextus resolutione, certus esse potest, & qualem interpretum sententiam amplecti debet, nisi interpretationi suæ textus analysin præmittat? Hinc thematis in textu contenti distributio in partes Homogeneas non raro falsam explicationem respuens, exegetam verum ad sensum deducit.

§. 3.

Licet omnes Christiani interpretes v. 10. Gen. XLIX. de Messia agi concedant, attamen v. 11. *Ligans ad vitem pullum suum, & ad nobilem vitem, fili mi, asinam suam:* non solum Judæi, sed & multi Christiani, inter quos Rivetius, Mercerus, Paræus, Lyranus, Tossanus, Grotius, Piscator, Flacius & alii de tribu Judæ ejusque promissa terræ fertilitate, non vero de Messia explicant. Au-

tumant

tumant enim hi autores, Patriarcham Jacobum, postquam de adventu Messiae v. 10. vaticinatus sit, ad propositum suum v. 8. inceptum nunc redire, ac tribui Judæ fertilitatem terræ, quam ejus posterii essent inhabitaturi, promittere, tantam nimirum in tribu Judæ fore vini copiam, ut ex unius vitis fructu asina, advitem alligata, onerari posset. Sed hanc sinistram explicationem respuit non solum συνάφια textus cum contextu ac scopo Jacobi, sed & analysi textus clare ostendit, hæc verba non de tribu Judæ ejusque terræ fertilitate, magnaue vini copia, sed potius de Messia ac vocatione Judæorum & gentilium agi. Nam Jacobus in hoc versiculo filium suum Judam ita alloquitur: *Messias gentiles ac Judæos ad ecclesiam vocabit*: ubi α) Subjectum est Messias ἡγούμενος ligans. β) Objectum est tam pullus, h. e. metaphorice gentiles, qui jugum legis Mosaicæ non ferebant, quam asina sive Judæi, oneribus ferendis assueti, quia lege Mosaica, tanquam gravi premebantur onere. γ) Locus est vitis, hoc est, metaphorice, ecclesia. δ) modus, in voce ligans, hoc est, vocabit, incorporabit, ac funiculo fidei sibi adstringet. Si vero hæc verba, juxta supra allegatos autores, de fertilitate terræ ingentique vini copia in tribu Judæ agunt, thema Jacobi sane tale esse oportet: *Tribus Juda magnam vini copiam in terra sua accipiet*: Sed quales partes hujus propositionis, quæ cum themate Jacobi conveniunt? Et in quibus verbis textus hæ circumstantiæ: Subjectum, objectum reale & actus: quæ necessario adesse debent, sunt quærendæ? Unde igitur ejusmodi sinistra horum verborum explicatio? Nonne ex neglecta textus ac contextus resolutione?

§. 4.

Multo magis in vero sensu mystico enucleando resolutionem exegeti præfigendam esse, nemo dubitare potest, dum ejusmodi textus sæpe obscuritate ac difficultate laborat, hinc multi in sono verborum hærentes, genuinum sensum in textibus parabolicis, typicis ac visionalibus à Deo intentum haud assequuntur, nec intentionem loquentis penetrant, cum sola verba, non res ipsas attendant. Verum enim vero in tali textu non ad varias circumstantias parabolæ vel typo ornatus tantum gratia annexas, nihil autem denotantes, sed ad primum scopum & thema principale loquentis est respiciendum. Inde August. lib. 16. de civit. Dei cap. 2. dicit: *Non sane omnia, quæ gesta narrantur, aliquid etiam significare putanda sunt, sed propter illa, quæ aliquid significant, attexuntur.* Verba B. Sebast. Schmidii in comment. in Judicum cap. IX. p. 849. de sensu mystico ita differentis, nobis valde arrident: *Ut nostram in genere exponamus sententiam: existimamus, observandam omnino esse regulam receptam: in apologis & parabolis non omnia esse applicanda, cum multa vel ornatus causa po-*
B
nantur

nantur, vel natura rei, unde apologus seu parabola sumitur, id exigente. Et res se omnino ita habet, & regula Theologorum est observanda: Theologia symbolica non est argumentativa. Gladius in Phil. S. lib. 2. de sensu mystico pag. 347. dicit: in parabolis, si integre accipiantur, tria sunt: radix, cortex & medulla. Radix est scopus, in quem tendit parabola. Cortex est similitudo sensibilis, quæ adhibetur. Medulla seu fructus est sensus parabola mysticus, seu ipsa res, ad quam parabola fit accommodatio.

§. 5.

Itaque optima via perveniendi in textibus parabolicis ad verum sensum mysticum est, si ubique tertium comparisonis inter thema loquentis primarium & parabolam seu simile instituat, & simul resolutio thematis in partes suas homogeneas explicationi parabolæ præmittatur, sic sane textui nulla vis infertur, quod autem, hoc requisito neglecto, omnino fit. Quæ causa, quod in parabola de prodigo filio Luc. XV. v. 11. seqq. nonnulli per prodigum filium Adamum, qui imaginem Dei amisit, per annulum Spiritum S. per vitulum mactatum sacrificium Christi, per epulum nuptias cœlestes &c. intelligant? vide Lyf. Harm. cap. CXXI. pag. 75. seqq. Nonne ignorantia primarii scopi in parabola a Christo intenti, atque neglecta textus resolutio, exegesi præmittenda, sunt causa ejusmodi contortæ & absurdæ explicationis? Quod scopum parabolæ attinet, Christus contra murmurantes Phariseos ac scribas factum suum, quod pœnitentes publicanos ac peccatores admisit, defendit h. m. quicumque concedit, patrem filium suum pœnitentem in gratiam recipientem, non injuste agere, ille etiam concedere debet, me pari modo non injuste agere, quod pœnitentes publicanos in gratiam recipiam: Sed vos conceditis, patrem, &c. Si igitur *πρότασις* parabolæ cum *ἀποδόσις* conjungitur, talis comparatio in textu continetur: *Sicuti prodigus filius, cum malitiam suam humiliter agnosceret, à patre suo in gratiam recipiebatur; ita quoque pœnitentes peccatores a me in gratiam recipiendi sunt.* Themate reperto, tunc non verba textus, sed res ipsa, five verus sensus mysticus, in partes homogeneas distribui potest, h. m. ubi est 1.) Subjectum, quod peccatores descripti tam a præterito statu impœnitentiæ, quam a præsentis statu pœnitentiæ. 2.) Prædicatum est illorum receptio descripta (α) a causa efficiente, quæ Christus, (β) a causa impulsiva, quæ ejus misericordia, (γ) a modo, (δ) ab effectu, qui Christi gaudium, (ε) ab eventu, qui hujus receptionis defensio, ubi p. Phariseorum murmuratio five invidia, contra quam Christus illam defendit, p. hujus defensionis qualitas. Reliquæ circumstantiæ in textu occurrentes, v. gr. porci, filiquæ, stola, annulus, calcei, vitulus faginatus, chori, hircus &c. non sunt ad rem spirituales applicandæ, cum plane alienæ a scopo, neque textus resolutionem

nem ingrediantur. Hinc canon V. in Glasf. Phil. S. p. 348. observetur: *in parabolis non est opus nimia cura in singulis verbis anxium esse, neque in singulis ejus partibus adoptatio & accommodatio ad rem spiritualem nimis anxiosus querenda est.*

§. 6.

Hic modus ad verum sensum mysticum perveniendi quoque in textibus typicis ac visionalibus valet. Sermo quidem hic non est de typis illatis & ab ecclesiæ patribus ac aliis excogitatis, sed de innatis & a Scriptura S. ipsa ostensis. De varia typorum divisione ac discrimine vide Glasf. Phil. S. lib. 2. pag. 318. seqq. Datur in genere duplex typus, historicus scilicet & propheticus. Historicus per historiam sive factum V. T. rem certam plerumque in N. T. gerendam, ac præsertim Christum ejusque beneficia præfigurat. Sic serpens æneus in commodum populi Israelitici erectus Num. XXI. v. 8. 9. Christum in salutem generis humani exaltandum adumbrabat. Joh. III. v. 14. 15. Ubi quoque typus cum antitypo suo in certo tertio est conferendus. Typus autem propheticus est vel actio prophetica, prophetæ divinitus inspirata, vel visio prophetica rem occultam ac futuram repræsentans. *Non solum sermone, sunt verba Irenæi, lib. 4. cap. 37. prophetabant prophete, sed & visione, & conversatione, & actibus, quos faciebant secundum id, quod suggererat Spiritus S.* Sic actio prophetica Esaïæ divinitus inspirata, qua nudus, seu veste prophetica exutus, incedebat, Ægyptios & Æthiopes a rege Assyriaco victos, qui nudi & spoliati incedere deberent, ex intentione Spiritus S. præfigurabat. Es. XX. v. 2-5. Visio prophetica vel vigilantibus, vel dormientibus divinitus oblata, rem occultam futuram adumbrat. Visiones autem duplicis generis esse animadvertimus, nonnullæ enim symbolorum in visione obvenientium additam habent interpretationem v. gr. Dan. IV. v. 7-12. & 17-24. Arbor formosa usque ad stirpem radicem simul cum omni ejus ornatu amputata, & a Nebucadnezare in somnio visa, regem Nebucadnezarem potentem a regio throno depellendum, omnique regia dignitate privandum, præfigurabat, juxta ipsius Danielis interpretationem. Nonnullæ vero nullam additam habentes symbolorum in visione obvenientium interpretationem, antecedentibus visionibus explicatu sunt multo difficiliore.

§. 7.

Cum igitur sequenti in capite visio prophetica a nobis interpretanda, principalis de genuino modo in visionibus ad verum sensum mysticum perveniendi jam eritur quæstio, hunc enim ignorans, in visionibus exponendis, sæpius hallucinabitur, nec mentem Dei assequetur, sed falsum sensum Scripturæ affinget. Magnum impedimentum esse, multos in visionibus propterea intentionem Dei

non assequi, quia in explanando textu visionali solummodo visionem ejusque verba, ac minutissimas circumstantias, non vero primario rem ipsam, per typicam visionem adumbratam, respiciunt, firmiter credimus, cum tamen ubique inter visionem ipsam & rem per typicam visionem præfiguratam, five inter exhibens & exhibitum accurate distinguendum, de qua re vero in commentariis altum est silentium. Ipsa Scriptura S. nonnullis visionibus explicationem immediate addens, diligenti lectori optimam quasi clavem illas rite interpretandi porrigit. Josephus inter visionem Pharaoni in somnio oblatam, & rem per istam præfiguratam distinguens, hoc tertium comparationis facit: *Quemadmodum septem vacca macilentæ e fluvio ascendentes, septem vaccas pingues devorarunt; Ita quoque septem anni famis venturi omnem abundantiam septem annorum præcedentium consument.* Gen. XLI. v. 19-21. & 30. 31. Hac via, scriptura ipsa præeunte, omnino etiam incedendum in textibus visionalibus explicandis, nullam additam interpretationem habentibus. Ante omnia autem ejusmodi visionum interpretatio ex toto contextu ejusque præcipuis circumstantiis, ex aliis parallelis scripturæ locis clarioribus, & ex visionis complemento, quæ ultima interpretatio omnium optima, desumenda, simulque analogiæ fidei conformanda est. v. gr. Am. VII. v. 1. 2. Propheta singularem habebat visionem: nempe locustæ ab aliquo, cordo e terra ascendente, formatæ, herbas & gramina terræ depascebant. Sed jam haud visionem ejus verba explicando, sed potius rem per hanc visionem a Deo repræsentatam, quæ ex contextu textusque resolutione constat, respicere nos oportet h. m. *Quemadmodum locustæ ab aliquo formatæ regias herbas ac cordum depascebant: ita etiam hostes, divino judicio excitati, totam regionem Israeliticam depopulaturi ac perdituri sunt.* Nunc textus partes sequentes explicandæ se ultro offerunt, nempe (α. Subjectum sunt hostes justo a Deo excitati, & regnum Israeliticum celerrime invasuri, qui per locustas ab aliquo formatas, & ingenti agmine irruentes præfigurantur. (β. Objectum est tota regio Israelitica, per herbas ac terræ gramina adumbrata. (γ. Modus consistit in totali regionis ruina, sub herbarum & cordi depopulatione repræsentata.

S. 8.

Benevolus Lector ne nauseam ex prolixè hætenus dictis hauriat, cum hæc præmittenda esse, omnino persuasi simus. Quomodo enim exegeta, in verba visionis illa explicando immediate ruens, absque cognito scopo & prævia visionis collatione cum re præfigurata, hujusque resolutione ac distributione in suas partes homogeneas, textui visionali satisfacere, atque divinum sensum assequi potest? Tantum abest, ut omissa visionis cum re adumbrata collatione, & neglecta adumbratæ rei in suas partes, inter se quoad constructionem bene cohæ-

rentes,

rentes, distributione, verus scripturæ sensus in visionalibus præsertim textibus investigari queat, ut potius in visionum interpretatione, contra Dei intentionem peccetur, dum verus sensus e scriptura, uti Theologi amant loqui, non eruitur, sed illi falsus infertur. Et licet in commentariis, ubi visiones explicantur, quos evolvimus, altum de hac re sit silentium, attamen experientia ipsa hunc modum comprobatur, imo noster textus Apocalypcticus hujus rei vivus quasi testis esse potest, quantum a chiliastris neglecto scopo ac omissa illius resolutione dilaceratus, inque plane sinistram sensum detorsus fuerit. Hinc firmiter persuasi, per multa quoque exempla biblica, in collegiis Exegetico-Homileticis hætenus habitis, dicto modo resoluta confirmati sumus, hunc modum ad verum sensum mysticum perveniendi esse legitimum: hæc omnia tamen acri Magnorum Virorum iudicio ac censuræ subicimus.

CAPUT III. EXEGETICUM.

De vero nostri textus visionalis sensu.

§. I.

IN nomine Sacrosanctæ Trinitatis nostrum textum aggressuri, eandem methodum, quam ex diligenti scripturæ lectione hausimus, inque præcedente capite aperuimus, observabimus, scopum visionis Johannææ ostensuri, illam cum re per hanc adumbrata, præeunte scriptura, collaturi, atque analysin interpretationi præmissuri. Hac regula enim neglecta, omnis explicatio visionis Johannææ in fumum abibit, & oleum ac operam, in visionis verbis solummodo hærentes, non vero in rem allegoricis verbis involutam, & a Deo præfiguratam inquirentes, perdent. Cum autem duæ visiones respectu scilicet rerum, (quavis nonnulli aliter sentiant, tamen absque fundamento,) nostro in textu reperiantur, quarum una statum ecclesiæ militantis, altera triumphantis adumbrat; hinc de utraque visione ejusque scopo ac sensu seorsim agendum. In capite XX. sub imagine Draconis ligati, soluti & judicati integra ecclesiæ facies, sive historia, a promulgatione Evangelii inter gentes per Apostolos facta, usque ad extremum diem omnino præfigurari videtur, hinc hæc visio visionum priorum est quasi ἀνακεφαλαιωσις. Johannes quidem Asiaticas ecclesias compellat cap. I. v. 4. usque ad finem cap. III. tamen aliarum quoque ecclesiarum conditionem & statum prædicere jubetur his verbis: *ascende huc, & ostendam tibi, quæ oportet fieri post hæc.* Cap. IV. v. 1. *Καὶ εἶδον*, & vidi, sunt verba initialia, ac reddi possunt: deinde, vel post hæc, vel porro ac insuper, vel alia nova revelatione vidi. Quod pri-

nam Johannis visionem, vel potius unius ejusdemque visionis primam attinet partem, illius oculis vel corporis, vel mentis angelus e cœlo descendens, clavemque abyssi tenens oblatus fuit, qui magna catena in manu Draconem comprehendendo vinctum in abyssum, ne amplius gentes seduceret, mille annos conjiciebat, quem vero consummatis mille annis e custodia sua solvebat. Quemadmodum autem Johannes in hoc prophetico libro præfixum scopum habet, Ecclesiæ faciem sive conditionem, quam Christus ei in variis visionibus ostenderat, depingere, vide cap. I. v. I. & IV. I. hinc ecclesiæ mox horribilem, mox florentem statum prænunciat, dum omnia ejus vaticinia ad certa temporum intervalla, & factorum ecclesiæ mutationes spectant: Sic quoque in nostro textu res sese habet. In prima visionis parte Johanni futurus ecclesiæ militantis status florens ac quietus repræsentatur, quod Christus diabolo non amplius permissurus, Ethnicos imperatores, aliosque tyrannos ac hostes, uti hætenus factum, ecclesiam turbare, ac tam crudeliter persequi, sed illi potius halcyonia concessurus, quo per longum temporis intervallum in pace vivere, ac quiete frui possit, usque dum, consummato hoc tempore a Deo decreto, diabolus Muhammedanos aliosque tyrannos ac hostes ad Ecclesiam de novo crudeliter persequendam impulsurus sit.

§. 2.

Sicuti autem in textibus visionalibus, visionem in quodam tertio cum re per illam præfigurata conferre, ac *πρότασιν* in ipsa visione *ἀπόδοσιν* vero in mystico sensu quærere, optimus modus est; ita quoque in nostro textu, quo veritas rei eo clarius elucescat, procedendum h. m. *Quemadmodum angelus de cœlo descendens, magnamque catenam in manu habens, in visione Johanni representatus, certum draconem ligatum per mille annos in abyssum detrudebat, ne amplius gentes seduceret; Ita Christus omnipotens Deus diabolum ejusque furorem in posterum per longum tempus cohibebit, ne tam crudeliter in ecclesiam sævire, nec per Ethnicos imperatores aliosque hostes graves persecutiones excitare queat.* Nunc ante verborum ac phrasium explicationem thesia hanc menti Johannis respondentem: *Christus omnipotens Dominus diaboli furorem in ecclesiam per certum tempus valde compefcet*: in partes suas, cum thesi accurate coherentes, distribuemus hunc in modum: α.) in subjectum. β.) objectum. γ.) modum. δ.) tempus. ε.) finem: sic omnia fient clara.

§. 3.

Primo itaque subjectum, furorem diaboli cohibens, in visione præfiguratum, explicabimus. Sed B. L. quod a communi modo visiones interpretandi, quo commentatores utuntur, abeamus, ne vitio nobis vertat, cum prægnantes

tes habeamus causas. Interpretes in explicandis visionibus, uti ex eorum commentariis constat, immediate, neglecta visione sive similitudine, qua res mystica involvitur, in nudis verbis sensum quærunt dicentes: Per angelum a Johanne visum Christus intelligitur, per draconem ab angelo ligatum diabolus. &c. Qui modus autem textum visionalem tractandi, ut cum pace horum doctorum Virorum dicamus, nobis haud arridet, quoniam sic visio, qua res mystica tegitur, plane intacta relinquitur, quasi in visione nullus sensus literalis verborum detur, quod vero cum plurimorum Theologorum sententia pugnat, (*quilibet scriptura locus sensum literalem admittit*, juxta Canonem III. Glass. in. S. Philol. libr. 2. de sensu liter. pag. 277.) simile sive visio quoque non in quodam tertio ad sensum mysticum applicatur, neque discrimen inter id, quod Johannes vidit, & quod per illud præfiguratum est, instituitur. Quæro, an oculis Johannis, vel corporalibus, vel mentalibus angelus certus de cœlo descendens, vel etiam draco in visione oblatus fuerit, nec ne? Si prius, cur sensus literalis non urgetur, sed celatur? Si posterius, nonne scriptura falsitatis accusatur referens, Johanni in visione angelum ac draconem apparuisse, quos autem non viderit. Accedit & hoc, contra canonem Theologorum peccari: *Plus est sape in typo, quam in antitypo*: item: *non opus est, nimia cura in singulis verbis anxium esse*. Glass. ibid. pag. 331. & 348. sic enim omnia ac singula vocabula, in visionibus reperta, præter mentem sacri viri ad rem mysticam accommodantur,

§. 4.

His præsuppositis, exegefin textus aggressuri, Subjectum tam in visione breviter declarabimus, quam quoad sensum mysticum aperiemus. Hoc unicum a B. L. expetimus, ut in interpretanda hac visione non tam commentatores, quoad hunc textum in diversas, imo nonnunquam inter se contrarias sententias abeuntes, suoque dissensu rem intricatissimam facientes, ut genuinum sensum eruiturus, lectione commentatorum, confusus fiat, sed regulas hermenevticas adire & attendere nobis liceat. Subjectum itaque Johanni in visione oblatum est angelus de cœlo descendens. Per angelum de cœlo descendentem, & a Johanne visum, Christum ipsum intelligunt Flaccius, Chytræus, Calovius, Neumanus, Gerhardus, Aretius, Hoë, Pfeifferus & alii; Cornelius a Lapide, Ribera, Diirfeld aliique creatum. D. Phil. Nicolai Tom. 2. oper. latin. fol. 185. Pontificem Romanum, cum jactaret, sibi cœlorum claves concreditas esse: Brigtmannus Constantinum Magnum. Sed h. l. omnino distinguendum est inter angelum visum, & personam per illum præfiguratam. Hinc, Johannem omnino creatum angelum e cœlo aëreo descendentem vidisse, dicendum, uti quoque custodes tempore resurrectionis Christi angelum Domini e cœlo descendentem, cujus species erat

erat sicut fulgur, & indumentum album sicut nix, viderunt. Matth. XXVIII. v. 2. 3. Hic quoque angelus apparens in manu sua clavem, qua janua referari potest, (uti quinto angelo clangenti talis clavis putei abyssi data erat. Apoc. IX. v. 1.) magnamque catenam, qua homines, vel etiam mordaces bestiae, ligari solent, in manu habebat. Hic est sensus literæ sive visionis. Per hunc angelum creatum, Johanni in visione oblatum, in manu clavem abyssi magnamque catenam habentem, ex intentione Dei angelus increatus filius Dei adumbratur, uti ita nominatur Gen. XLVIII. v. 16. Exod. XIV. v. 19. Malach. III. v. 1. potentiam & potestatem in diabolum & infernum habens, dum Satanæ impedimenta in seducendis gentibus ponere potest: *Habeo claves inferni ac mortis*, Apoc. I. v. 18. *Hæc dicit Sanctus ac verus, qui habet clavem Davidis, qui aperit, ut nemo claudat, & claudit, ut nemo aperiat.* cap. III. v. 7. *Hic fortior robustum ac potentem vincendi potentiam habet.* Luc. XI. v. 22. *Hic venit, ut opera diaboli dissolveret.* 1. Joh. III. v. 8. Solius Dei est, Satanam coercere, & intra positos limites continere. Utrumque claves habere & ligare, est symbolum tam potentiae, quam potestatis Christi. Sic claves traditæ metaphorice potestatem denotant. Matth. XVI. v. 19. Es. XXII. v. 22. Sic breviter sensum literalis, tum mysticus monstratus est; ac hæc duo quoque B. Dn. Lœscheri verba in disput. de chiliafin. Thes. VI. desiderant: *diligenter advertendum est, ut inter significationem tropicam singulorum verborum vel sententiarum, quæ sensum literalem gignit, & inter explicationem mysticam, quæ loci alicujus usum spirituales summam duntaxat indicat, sensumque literalem sive historicum singulorum verborum sive sententiarum, necessario supponit, rite ac recte distinguamus.*

S. 5.

Objectum in visione Johannæa refrænatum erat draco. *Dracones sunt nihil aliud, juxta verba B. Cypriani in hist. Anim. 609. 613. nisi serpentes valde annosi, & idcirco non differunt a reliquis serpentibus, nisi magnitudine: alii longi quinque cubitos, alii decem, alii 39. alii 40. Et magni præsertim squamis sunt obfiti per totum corpus asperrimis, biante rictu oris, longa lingua, dentibus longis instar apri, quibus cum mordent, etiam ossa corporis frangunt, neque tam veneno, quam robore caudæ valent.* Talis draco stabat coram muliere, quæ paritura erat, ut, quando peperisset filium suum, deuoraret. Apoc. XII. v. 4. Mentio quoque fit in additamentis historiæ Danielis magni draconis, cui Babylonii quotidie plurimos cibos cogebantur offerre, quem Daniel interfecit, coniecto in os illius quodam remedio cocto. Et quod ejusmodi draco, qui species serpentum, a Johanne visus fuerit, quemque angelus de cælo descendens comprehenderit, quis dubitare potest, dum istum nominat serpentem antiquum. Quod vero per hunc draconem

nem & serpentem antiquum diabolus, gentes seducens, adumbratus fuerit, luce meridiana clarius est, (licet Lyra per istum intelligat Henricum V. & Brigtmannus Maxentium & Maximinum:) statim enim hæc verba adduntur: *qui est diabolus & Satanas.* Sub imagine draconis & antiqui serpentis diabolus depingitur, propter iræ vehementiam, virulentiam, calliditatem & astutiam, confer Apoc. XII. v. 12. qui serpente organo suo abutens, Protoplastos callide circumvenit ac seduxit. Gen. III. v. 1-6. *διάβολος* à *διαβάλλειν* calumniari, decipere dictus Deutr. XXII. v. 19. Dan. VI. v. 24. idem est ac calumniator ac convitiator Eph. IV. v. 27. 1. Tim. II. v. 6. 7. quia Deum apud homines, & homines apud Deum calumniatur & accusat. Job. I. v. 9. 10. 11. Apoc. XII. v. 10. *ἁδὲν* a radice *ἁδὲν* adversari, vi resistere, dictus. 1. Par. XIII. v. 17. Num. XXII. v. 22. 32. idem est ac adversarius & hostis. 1. Sam. XXIX. v. 4. 1. Reg. XI. v. 14. 23. 25. quia Deo & hominibus adversatur, totumque genus humanum immani prosequitur odio. Apoc. XII. v. 13. 1. Petr. V. v. 8. Et hunc hostem ejusque furorem in ecclesiam Christus in posterum compescere volebat.

§. 6.

Sequitur modus hujus ligationis. Johannes videbat, quod angelus è cælo descendens draconem hostiliter aggrediretur, ac violenter comprehenderet, uti *κρατεῖν* usurpatur de malo servo, debitorem suum magna violentia invadente, collumque constringente, Matth. XVIII. v. 28. ut & de viris bellicosus, socios suos violenter comprehendentibus ac gladiis latus perfodientibus. 2. Sam. II. v. 16. Non solum draconem angelus magna catena manu tenens ligabat, inque magnam voraginem a Johanne visam & abyssum, tanquam in carcerem captivum conjiciebat, ostium abyssi clave in manu concludebat, illudque annulo obsignabat, ne fortasse clam vel vi ex abyssu erumperet. Sic principes exercitus Nebucadnezaris Manasse catenis ligatum in Babel abducebant, inque carcerem conjiciebant, 2. Par. XXXIII. v. 11. & Pharisei lapidem super sepulchrum Christi positum, ne resurgere deberet, obsignabant. Matth. XXVII. v. 65. Per hanc ligationem draconis, detrusionem in abyssum & ejus obsignationem non rejectio diaboli in infernum, juxta nonnullorum opinionem, intelligitur, sed cohibitio ac coercitio diabolici furoris depingitur. Sicuti enim mordaces ac furiosæ bestię vinculis ligantur, inque foveam, ne hominibus damnum inferant, conjiciuntur; ita quoque Christus omnipotens Dominus furorem diaboli, ne in ecclesiam tam crudeliter sæviat, neque tantas persecutiones, uti antea factum, per ethnicos imperatores,

ratores, Saracenos, Turcas aliosque hostes excitet, cohibiturus, & ecclesiæ halcyonia concessurus erit.

§. 7.

Tempus, quamdiu draco ab angelo ligatus & in abyſſo conclusus fuerit, continetur in his verbis: *vinxit eum χίλια ἔτη mille annos.* Johannes non solum, quod angelus e cœlo descendens draconem ligatum in abyſſum detruderet atque concluderet, videbat, sed &, quod draconis ligatio seu custodia mille annos duraret, ac isse non prius, quam consummatis mille annis, ex abyſſo emitteretur, animadvertibat. Sic etiam Johannes, quod angelus urbem, a Deo e cœlo descendentem, calamo mensus fuerit in stadiis duodecies mille, vidit. Apoc. XXI. v. 16. Quæritur nunc, quid hi anni mille a Johanne visi, in quibus draco in abyſſo ac custodia detentus fuit, adumbrare debeant? Chiliastæ ex his mille annis regnum suum chiliaſticum fuxerunt, hoc textu abusi haud exiguas turbas in ecclesia moverunt, statuentes, Christum ante extremum iudicium in terram visibiliter rediturum, atque cum piis resuscitatis per mille præcise annos in mundo regnaturum. B. Calov. Bibl. illustr. pag. 1908. seqq. interpretes quoque respectu horum mille annorum inter se haud conveniunt, an pro tempore certo ac definito, num pro incerto & indefinito accipi debeant? Priori sententiæ adstipulantur B. Kromayerus, Hoë, Lucius, Aretius, Flacius, Pareus, Thummius, Pfeifferus, Calovius, Hoffmannus, Heunischius alique: Posteriori autem Augustinus, Ambrosius, Gregorius, Beda, Cramerus, Feuerbornius, Ribera & alii. Numerum certum per τὰ χίλια ἔτη intelligentes quoque discrepant, ubi sc. ponendus sit terminus horum mille annorum a quo & ad quem. B. Heunisch, in clave Apoc. pag. 28. terminum a quo incipere tempore Caroli Magni ann. 800. non vero tempore Constantini M. autumat. Plerique, terminum a quo incipiendum esse anno Christi 300. in Constantini M. Imperio, & terminum ad quem se usque ad annum 1300. extendere, statuunt, licet alii quoque aliter sentiant. Nam diabolus, dicunt, primis trecentis annis ethnicos imperatores ad decem horribiles christianorum persecutiones impellebat, ut in istos violenta ac crudeli inmanitate sævirent, suamque idolomaniam igne & ferro propagare conarentur. Sed Constantinus Magnus his gentilium crudelibus persecutionibus frænum injiciens, hostes suos, Maxentium, Maximinum & Licinium, bello vincebat, atque ecclesiæ halcyonia, quæ usque ad annum 1300. durabant, concedebat.

§. 8.

Nobis potius sententia eorum, qui mille annos symbolice pro tempore satis longo & indefinito sumi sentiunt, arridet, quia non tantum mille per hebraismum & usitatam in Scriptura Synecdochen pro tempore indefinito ac satis longo usurpatur, Exod. XX. v. 6. 1. Sam. XVIII, v. 7. Psalm. CXLIV. v. 13. sed & persecutiones a Johanne descriptæ tam ad ethnicos ac Turcas, quam ad regnum Anti-Christicum spectant, vide v. seqq. 4. Accedit & hoc, quod mille anni Johanni in visione oblatis, in quibus draco in vinculis & carcere detentus fuit, juxta principia hermeneutica haud repræsentare possint præcise mille annos, sed tempus longum, non hominibus, sed soli Deo omniscio cognitum, cum aliud sit res præfigurata, aliud Symbolum, sub quo præfiguratur. Sicuti enim angelus magnam catenam manu tenens, ac draco victus non eadem, sed alia objecta adumbrant; ita quoque mille anni. Dubitamus quoque unicum locum ex tota Apocalypsi Johannæa ostendi posse, in quo tempus vel numerus in visione repræsentatus, planus & nude positus eodem modo pro tempore aut numero definito sumatur. Numerus definitus ac determinatus potius pro indefinito ac incerto usurpatur tam in parabolis Matth. XX. v. 3. 5. 6. Luc. XIII. v. 7. 8. quam visionibus. Ezech. XL. v. 5. seqq. cap. XLI. XLII. & XLVII. Zach. V. v. 2. Apoc. VIII. v. 1. XI. v. 11. XIII. v. 5. XIV. v. 1. 20. XXI. v. 16. 17. Cur non ex inductione horum locorum inferre licet? Ergo quoque in nostro textu visionali mille anni aliud temporis spacium, nobis vero ignotum, adumbrant.

§. 9.

Dubitandum autem est, an commode, juxta opinionem plurimorum autorum, dici possit, Satanam a Constantini M. tempore ligatum, ac hoc vaticinium impletum, & post ævum Constantini ecclesiam a violentis persecutionibus per mille annos immunem fuisse, ac in pace & requie vixisse? Nonne statim post Constantini M. tempora sub persecutionibus Arianicis, non solum fraudulentis, sed & violentis, Satanas valde sæviens gravissimas persecutiones ecclesiæ excitavit? Et quas graves Julianus Apostata post tempora Constantini movit? Quam crudelia quoque bella Saraceni ac Turcæ nonnullis post Constantinum seculis, florentissimis Imperii Romani regionibus intulerunt, illasque occuparunt, ac Christianis Syriam, Armeniam, Ægyptum, Africam, universam Asiam minorem, Cyprum, Siciliam, Sardiniam, Hispaniam aliasque regiones eripuerunt, & in ecclesiam crudeliter sævierunt? vide Hist. Eccl. Gothanam part. 2. pag. 455. 468. 499. Imo barbaræ gentes,

Gothi, Wandali, Longobardi, Hunni alique hostes in Seculo IV. V. & VI. usque ad VII. continuis irruptionibus, Imperium Romanum, non solum in oriente, sed & in occidente, devastarunt, ecclesiamque crudeliter persecuti sunt, vide Boxhornii Histor. Univers. An ejusmodi temporibus Draconem ligatum, inque carcerem, ne gentes seduceret, conjectum fuisse, & ecclesiam in tranquillitate vixisse, dici possit, judicio aliorum relinquam. Deinde animæ cum Christo mille annos hos regnantes describuntur ut tales confessores, qui bestiam non adoraverunt; sed tempore Constantini M. bestia non potuit adorari, cum nondum in confessores veritatis favire cœperit, sed seculis a quarto longe remotioribus. Si quoque solutio Satanae Turcas seducens 1300. facta esset, quomodo hoc tempus durationis usque ad 1700. modicum appellari posset, dum plus, quam tertia pars horum mille annorum est? Itaque omnino gradus hujus ligationis, durantibus mille annis, agnoscendi sunt. Pipinus quoque, debellatis Saracenis, Westphalis aliisque populis idololatricis & Carolus M. passim in Germania, extirpato idolorum cultu, ecclesiam protexerunt, illique pacem concesserunt. Hinc B. Heunischius, in sua clave Apocal. ab anno 800. mille annos inchoandos esse autumat. Sed, quo tempore præcise hi mille anni cœperint, & quo anno finem habituri sint, determinare non audeo, nec Spiritui Sancto placuit hæc nobis aperire. Interim non dubitamus, quin hi mille anni hoc tempore nondum consummati sint, sed adhuc durent, & draco ligatus sit, dum ecclesia a violentis ac crudelibus persecutionibus ethnicis, Muhammedanis ac barbaris immunis, & halcyoniis a Deo concessis fruitur, bellum etiam crudelissimum, ecclesiæ in Germania, confer Apoc. XII. a Gogo & Magogo, quorum numerus ut arena maris, inferendum, in sequentibus versiculis prædicitur, quod fane impletum esse non videtur. Persecutio enim Gogi & Magogi ultima, soluto Satana & mille annis impletis, multo gravior ac terribior antecedente a Spiritu S. describitur, dum isti ecclesiam evangelicam, quæ ex oriente in occidentem fugit, Apoc. XII. v. 6. & 14. non tantum invasuri, sed & oppressuri erunt, licet exiguum tempus, quia hoc immediate judicium extremum sequitur. conf. Cap. IX. v. 14 - 21, ubi dicitur, quod in hoc bello Turcico tertia hominum pars occidenda sit. Johannes Marckius in Apocal. pag. 943. exaggerat phraseologiam his verbis: *Notatur hac phrasi, ecclesiam ab hostibus non tantum fuisse oppugnatam, sed & undique arcte inclusam, absque humana spe emergendi, ita ut ad angustias summas, in quibus unus Deus ex cælo opem ferre posset, illa fuerit redacta.* Vitringa in Comm. in h. l. pag. 873. scribit: *Omnes fere interpretes sanioris judicii,*

dicit, qui in Prophetia hujus libri exponenda versati sunt, hic haerent, & nemo eorum est, quod sciam, qui haecenus affirmaverit, demonstrari integrum implementum hujus Prophetiae in historia, omnes illud in futurum tempus conjiciunt, & inter eos ipse quoque Grotius. Heunischius in clave Apoc. p. 38. dicit, de ultima sc. calamitate a Christo praedicta: Cum igitur talis nondum evenerit, est utique adhuc expectanda. Et hanc futuram esse illam Turcicam, quis amplius ambigat? Qui enim, quae de Gog & Magog tum Ezechiel tum Apocalypsis habent, jam duum impleta esse autumant, nimium certe falluntur. Sive igitur spectes amplitudinem, ut longe lateque se diffundet, sive qualitatem aut durationem, veletiam effectum, qui non corpus tantum & bona terrena, sed ipsam animae salutem tanget, horribilior erit ista tribulatio illa Hierosolymitana. Imo hic vir in Epilogo hujus Comment. Vienna Austriae ab exercitu Turcico obfessa, scripto, determinat tempus, quo solutio draconis initium capere deberet his verbis. pag. 197. Ab ea tamen nondum dimoveor sententia, quam in hac clave ex Apocalypsi Johannea demonstravi, quod nimirum nondum adsit tempus, quo Germania nostra totumque imperium in potestatem Turcarum est venturum, sed quod id demum post annum Christi 1750. futurum sit.

§. 10.

Tandem finis, cur Christus furorem diaboli in ecclesiam compescere velit, indicatur, ne amplius sc. gentes seducat, usque dum consummarentur mille anni. Ἐθνὴ vi famosioris significationis denotant in genere populos ac nationes. Matth. XXVIII. v. 19. Apoc. VII. v. 9. Act. XVII. v. 26. Matth. XXVI. v. 32. Marc. XI. v. 17. Antea multos per annos diabolus tyrannis ac hostibus veræ religionis, suam infidelitatem & superstitionem gladio & igne propagare conantibus, consilia ecclesiae Christi noxia inspiraverat, in eis amorem idololatriæ ac superstitionis, & odium veræ religionis suscitaverat, illosque horrendas ad persecutiones veræ ecclesiae impulerat; ne autem ejusmodi tyrannos ac hostes amplius ad ecclesiam tam crudeli modo persequendam excitaret, Christus diaboli potentiae ac furori resistere, illique impedimentum ponere, & ecclesiae halcyonia per longum temporis spatium concedere sibi constituerat. Impleto autem hoc tempore, ligatum draconem solvere, sive diabolo permittere vellet, ut Muhammedanos, Saracenos, Persas, Tartaros ac alios hostes ad novas ac valde crudeles persecutiones ecclesiae ob ingratitudinem in Deum ejusque verbum & securitatem, per breve tempus impelleret. Hæc est prima pars visionis Johanneæ ejusque genuina interpretatio, ac verus sensus.

§. II.

Sequitur secunda pars hujus visionis, ad ecclesiam triumphantem spectans. Quærere enim quis posset, quid interim his mille annis diabolo sc. ligato, animabus illorum, qui ob testimonium Christi in persecutionibus ethnibus, Muhammeticis, & Anti-Christianis trucidati sunt, acciderit? Johannes respondet, illas in cœlis gloriose vixisse, cum Christo regnasse, omnique honore & cœlesti gloria esse frui, hinc ait: καὶ εἶδον vidi etiam, quasi dicat: non solum statum ecclesiæ militantis vidi, καὶ εἶδον vidi quoque sortem ecclesiæ triumphantis. Quo vero scopus Johannis eo clarius elucescat, πρότερον cum ἀποδόσει hoc modo conferam: *Sicuti animæ propter Christi testimonium decollatorum, ac characterem super frontem suam non accipientium, a Johanne sub imagine vise, super thronis sedebant, ac mille annos, in quibus draco ligatus erat, cum Christo regnabant; ita quoque beate mortui martyres ac veritatis evangelicæ confessores in vitam eternam translati, ibi felicissimo statu summoque honore ac gloria fruuntur, quo statu autem glorioso impii, idololatriæ ac superstitioni dediti, inque peccatis ex hac vita discedentes, privantur, & æterna damnationi subjacent.* Hinc ex intentione Johannis talem thesin sub visione contentam, ante verborum interpretationem, cum sensus sit intricatus, eruam, atque in partes bene inter se cohærentes distribuam h. m. *Beate mortui martyres ac evangelicæ veritatis confessores tempore quietis, ecclesiæ interris a Deo concessæ, in cœlis summo honore ac cœlesti gloria fruuntur:* in qua thesi se hæ partes explicandæ ultro offerunt: (α. Subjectum, describitur p. positive, sunt nimirum beate demortui martyres, ac veritatis evangelicæ confessores, p. remote, non sunt impii in peccatis ex hac vita discedentes. (β. Qualitas, describitur p. positive, est status gloriosus & felicissimus, p. remote non est status infelix, utpote qui ad impios demortuos spectat. (γ. Tempus durationis est longum temporis intervallum. Absque hac præmissa textus resolutione ac distributione in suas partes, vix mentem Dei quis assequi potest.

§. 12.

Subjectum igitur in visione Johannæa sunt tantum animæ a corporibus separatæ. In textu est transpositio Subjecti & prædicati more scripturæ, uti Rom. VI. v. 23. & Apoc. XV. v. 13. Johannes animas decollatorum, super thronis collocatas, illique sub certa, nobis autem ignota, specie ostensas, vidit. Sic quoque sub altari animas occisorum propter verbum Dei, & propter testimonium, quod habebant, clamantes voce magna vidit. Apoc. VI. v. 9. Pari modo hic Johannes quoque vidit animas, tam quæ super thronis

confederunt, quam quæ super illis non federunt. Nam h. l. omnino repetendum est verbum εἶδον & vidi τὰς ψυχὰς animas sc. & beatorum, & damnatorum, uti Marc. XVI. v. 7. dicite discipulis & Petro sc. dicite. Per has animas duplicis generis, a Johanne sub certa forma visas, adumbrantur tam illi, qui statu felicissimo, diabolo ligato, in cœlis fruuntur, quam isto privantur. Prius Subjectum, Johannes in duas classes distribuit, suntque animæ p. decollatorum. p. eorum, qui bestiam non adoraverant. Per priores, securi sc. percussos, Johannes martyres in persecutionibus præsertim ethnicis ac Muhammeticis occisos depingit. Πεπελεκισμένοι securi percussi, a voce πελεκυς securis dicti. Pf. LXXIV. v. 6. Bar. VI. v. 15. Fuit hoc pœnarum genus Romanis olim usitatissimum, dum fontes securi percutere solebant, (inde magistratus Romanus quoque cum securibus incedebat,) uti etiam adhuc in nonnullis regnis moris est. Per decollationem h. l. per Synecdochen speciei pro genere quodlibet supplicium, quo martyres a tyrannis affecti sunt, indicatur, uti quoque per gladium Matth. XXVI. v. 52. causam etiam, cur tam innumerabiles martyres trucidati, Johannes aperit, scilicet propter testimonium JESU, & propter verbum Dei, quia de JESU, quod sit filius Dei ac mundi salvator, per quem quis unice salutem consequi possit, testati sunt, verbumq; Dei receperunt ac defenderunt, & ob hanc causam morte martyrum obierunt. Posteriores, qui prioribus martyribus annumerantur, sunt bestiam non adorantes, neque imaginem ejus aut characterem super frontem suam, aut super manum suam accipientes. Quod sub imagine hujus bestię Anti-Christus & Papa Romanus depingatur, uti Apoc. XIII. v. 11-16. cap. XVII. v. 3. seqq. cap. XIX. v. 19. 20. cap. XX. v. 10. probat variis argum. B. Hoë in Comin. in Apoc. pag. 475. seqq. Adorare bestiam & ejus imaginem idem est, ac divinum honorem contra Dei verbum Anti-Christo exhibere, illique in omnibus parere. Characterem super frontem ac manum accipere denotat ejus idololatriam profiteri, hacque re palam testari, se non ad Christi, sed ad Papæ castra pertinere. Per hos adumbrantur evangelici confessores præsertim sub papatu, qui falsam Anti-Christi doctrinam non receperunt, neque illius varias uncturas, rasuras ac similia signa idololatrica approbarunt, uti inconstantes hoc fecerunt. Apoc. XIII. v. 8. sed a papizantibus hæresibus animas in fidei puritate & doctrinæ simplicitate custodiverunt, in agnita religione evangelica constantes fuerunt, & pro sincera fide Christiana exilia, ignominiam, afflictiones, supplicia ac tormenta, imo mortem violentam forti animo tolerarunt. Quot millia ac myriades evangelicorum Christianorum papistæ in multis regionibus trucidaverint, histo-

riæ testantur. Hi martyres ac constantes veritatis confessores sub Gentilismo, Muhammedismo & papisimo sunt subiectum illud, quod mille annos, a Johanne visos, felicissimo in cœlis statu fruitur. Quod in v. 4 post fœmininum τὰς ψυχὰς sequitur masculinum οἱ τινες, qui bestiam sc. non adorarunt, ut & masculinum αὐτοῖς præcedit, est enallage generica in scriptura usitata, indicans, non de rebus, sed de personis sermonem esse. v. gr. Euntes docete πάντα τὰ ἔθνη omnes gentes, baptizantes αὐτὰς eos. &c. Matth. XXVIII. v. 19. Τεκνία μὲν, ἔς πάλιν ἰσθύνω, filioli mei, quos rursus parturio. Gal. IV. v. 19. Et non tenens τὴν κεφαλὴν, ἐξ ἧς caput, ex quo totum corpus constructum &c. Col. II. v. 19. In quibus locis pari modo occurrit enallage generis, confer etiam Apoc. VI. v. 9-11. ubi fœmininum præcedit, & masculinum sequitur: & Joh. XV. v. 26. præcedit neutrum, & sequitur masculinum: Quod attinet relativum αὐτοῖς præcedens v. 4. iudicium datum est eis: referendum est ad id, quod in textu sequitur, ut Matth. XVII. v. 18, vide Glasf. Phil. S. tract. 2. can. 11. pag. 194.

§. 13.

Subiectum vero, quod hoc statu glorioso in cœlis carere oportet, sunt ψυχὰι reliquorum demortuorum, hoc enim subiectum est omnino repetendum. Piscator in h. l. per reliquos mortuos, qui non revixerunt intra hos mille annos, intelligit reliquos omnes corporaliter demortuos, qui non sunt martyres, tam bonos, quam malos, citante Hoë in Comm. B. Pfeifferus in Anti-Chil. sermonem esse de spiritualiter mortuis, qui adhuc in vivis sunt, autumat. Reliqui interpretes omnes, quos evolvimus, B. Hoë, Thummio & Marckio exceptis, de spiritualiter mortuis, qui intra mille annos visionales a peccatis ad novam vitam non resurrexerunt, explicant, non vero simul de corporaliter talibus. Verum enim vero hanc interpretationem, ut cum pace ejusmodi Magnorum Virorum dicamus, propter connexionem cum antecedentibus, ac principia Hermenevtica non possumus amplecti, quia in toto hoc textu Spiritus S. de animabus a corporibus per corporalem mortem separatis, non vero cum iisdem unitis, loquitur. Sicuti enim in v. 4. de martyrum ac veritatis confessorum animabus a corporibus per mortem corporalem ac beatam solutis sermo est; ita quoque in v. 5. vi oppositorum per cœteros mortuos impiorum idololatriæ addictorum, hæreticorum ac hypocritarum animæ, quæ per corporalem mortem a corporibus separatæ erant, intelliguntur. Οἱ λοιποὶ τῶν νεκρῶν illis, qui ob evangelicam veritatem decollati, vel etiam in ista constantes confessores usque ad mortem manserunt, opponuntur, & sunt tales, qui

qui neque martyres propter testimonium JESU, neque ex eorum numero fuerunt, qui bestiam non adoraverunt, sed potius in vivis idololatriæ bestiae usque ad mortem addicti veritatem evangelicam spreverunt. Johannes igitur omnes corporaliter demortuos, in beate & non beate mortuos distribuit, illorum statum ut felicissimum, horum autem ut infelicissimum describens. Sicuti mors vitæ æternæ opposita nullo modo, uti nonnulli explicant, mortem temporalem, sed æternam, vi oppositorum, denotat: Rom. VI. v. 23. Ita quoque reliqui mortui, Paganismo, Muhammedismo ac Papismo pertinaciter adhærentes, quia beate mortuis opponuntur, sunt isti, qui in idololatria, impietate & incredulitate ex hac vita migrarunt. Quæ mors itaque in priori membro oppositionis intelligitur, eadem quoque in posteriori est intelligenda: Sed in priori intelligitur mors piorum corporalis: Ergo etiam in posteriori. Ita quoque manifesta est oppositio quoad vitam h. m. Martyres ac Confessores demortui vixerunt in cœlis, reliqui vero demortui sc. impii non revixerunt sc. in cœlis. Consentit Ambrosius in hunc locum scribens: *Cæteri autem mortuorum, id est, reprobi, post mortem corporalem non revixerunt, quia post mortem non ad vitam ducuntur, quæ in cœlestibus sanctorum animabus datur, sed in infernum demerguntur, quæ in hoc libro mors prima vocatur.* Οἱ λοιποὶ τῶν νεκρῶν reliqui mortuorum h. l. ponuntur pro reliquis mortuis: Similis constructio occurrit Apoc. IX. v. 20. καὶ οἱ λοιποὶ τῶν ἀνθρώπων & cæteri hominum, pro reliquis hominibus.

§. 14.

Sequitur nunc status animarum post mortem, & quidem primo beatarum. Qualitas gloriosæ fruitionis vitæ æternæ in cœlis Johanni repræsentatur. Vidit absque dubio magnum, augustum & regium conclave, & in isto multos regios thronos, super quibus animæ demortuorum martyrum & confessorum veritatis, sub certa specie, ac fortasse coronis aureis & albis vestibus ornatae, in regia dignitate confederunt, cum Christo mille annos, in quibus draco in abyssu detentus, regnarunt, atque in forma majestatica se conspicuas præbuerunt. Sic quoque Johannes vidit super thronis viginti & quatuor Seniores sedentes, indutos vestimentis albis, qui habebant super capitibus suis coronas aureas. Apoc. IV. v. 4. Quoniam hic locus est obscurus & valde difficilis, itaque omni studio in ejus verum sensum a Deo intentum inquirendum. Johanni in hac visione repræsentatur, qualem sortem martyres ac confessores intra spatium horum mille annorum habuerint, nempe felicissimam, licet oculis insipientium visi sint misere mori, & valde infelices esse.

Sedere in thronis, vel collocari super thronis metaphorice idem est, ac maxima gloria in cœlis frui, confer Apoc. III. v. 21. Cap. IV. v. 4. Cap. XI. v. 16. Hinc hæc sessio non de thronis judicialibus, uti nonnulli explicant, sed de thronis summi honoris piorum martyrum ac confessorum est intelligenda. Sic etiam iudicium dare h. l. non idem est ac iudicandi potestatem dare, uti nonnulli exponunt, cum hæc potestas animabus a corporibus separatis haud attribui possit; sed potius auctoritatem regiamque dignitatem concedere. Dan. VII. v. 22. Hæc phrasis quoque de Messia ipso usurpatur. Psal. LXXII. v. 1. 1. Joh. V. v. 22. Itaque his allegoricis phrasibus & sessione super thronis, cœlestis ac gloriosus animarum e corporibus per mortem egressarum status depingitur, quod Johannes ipse indicat, hæc verba addendo: *qui vixerunt & regnarunt cum Christo*. Vivere ac regnare cum isto idem est, ac maximo honore in cœlis frui, inque cœlesti pace ac tranquillitate vivere, ut & omnibus devictis hostibus, diabolo, mundo & carni gloriose dominari. Apoc. XXII. v. 5. 2. Tim. II. v. 11. & 12.

§. 15.

Johannes gloriosum animarum martyrum ac confessorum statum in cœlis describere pergens addit: *ἡ πρώτη ἡ ἀνάστασις ἡ πρώτη*, hæc resurrectio est prima, quæ verba cum v. 4. cohærent, dum v. 5. quasi parentheticus est, de quo infra. Chiliasinum propugnantes per resurrectionem primam intelligunt corporalem, interpretes autem Chiliasmo se opposcentes, veteres & recentiores, cum orthodoxi tum heterodoxi, quos evolvimus, exceptis B. Matthia Hoë in Comm. in Apoc. pag. 273. & Theodoro Thummio in impiet. Weigel, p. 338. 339. (etiam systemata Theologica v. gr. B. Gerh. Tom. VII. pag. 965. Brochin, P. II. pag. 6075. Quenst. Part. IV. pag. 657. Scherz, pag. 585.) per resurrectionem primam, spirituales a peccatis ad regnum gratiæ intelligunt, de qua ageretur Matth. VIII. v. 22. Apoc. III. v. 1. Eph. V. v. 14. Sed ut cum pace tam multorum Virorum Doctissimorum dicamus, illorum sententiæ non possumus assentiri. Nam nullibi in Scriptura S. neque etiam in locis jam citatis, resurrectio spiritualis nominatur resurrectio prima. Deinde *ἡ πρώτη ἡ ἀνάστασις* hæc ipsa resurrectio lectorem necessario ad certam resurrectionem, de qua Johannes in antecedentibus verba fecit, remittit; ac spiritualis resurrectionis in istis nulla mentio facta est: (multo minus corporalis, quam chiliasitæ arripiunt,) ergo etiam spiritualis hic non intelligitur. Spiritualis quoque resurrectio a peccatis animabus a corporibus separatis, de quibus solummodo hic sermo est, quatenus cœlesti in gloria vivunt, non potest attri-

attribui, uti hoc quoque B. Hoë in Comm. bene observat, quia martyres & confessores ante mortem suam in hoc mundo a peccatis resurrexerunt ad vitam spiritualem, non vero demum in cœlis, neque etiam ibi in spirituali resurrectione partem habent, quod tamen hic dicitur; *Beatus & sanctus, qui partem habet ἐν τῇ ἀνάστασι τῇ πρώτῃ in hac prima resurrectione.* Hinc αὐτῇ ἡ ἀνάστασις hæc resurrectio, a Johanne dicta ἡ πρώτη prima, remittit nos, ut connexio textus requirit, ad illam, de qua Johannes in v. 4. locutus erat his verbis: ἐζησαν, καὶ ἐβασίλευσαν μετὰ χριστοῦ, vixerunt & regnarunt cum Christo. Statum itaque animarum a corporibus separatarum beatum ac gloriosum in cœlis, antea per ista verba descriptum, jam nominat metaphorice resurrectionem, & quidem primam, ad differentiam secundæ resurrectionis die extremo futuræ, ubi totum compositum, sc. homo anima ac corpore constans, in cœlestem gloriam ac gaudia transferetur. Hæc autem prima resurrectio animarum a corporibus separatarum nihil aliud est, quam evectio, ascensio & translatio animarum ad vitam gloriosam ac cœlestem, qua animæ novam in vitam quasi resurgunt, ascendunt & transmigrant. Johannes solus hac phrasi utens, animarum translationem in vitam æternam nominat primam resurrectionem sc. ad cœlestis gloriæ perceptionem, istam piis martyribus ac confessoribus adscribens, de reliquis vero demortuis impiis eandem negans. Consentit nobis ex Patribus August. lib. 20. de Civ. Dei cap. 6. dicens: *sunt resurrectiones duæ, una prima, quæ nunc est animarum, quæ venire non permittit in mortem secundam; alia secunda, quæ nunc non est, sed in fine sæculi futura est, nec animarum, sed corporum est, quæ per ultimum iudicium alios mittet in secundam mortem, alios in eam vitam, quæ non habet mortem.* Si Judæorum restitutio sive ecclesiæ restauratio quoque audit metaphorice resurrectio; Ezech. XXXVII. v. 1-14. Si quoque hominum a morte peccati translatio ad vitam gratiæ spiritualis resurrectio dicitur; cur non etiam animarum e mortalibus ac peccato obnoxiiis corporibus translatio in vitam gloriæ appellari meretur metaphorice resurrectio?

§. 16.

Hanc interpretationem Johannes in sequenti versiculo confirmat, illum occisum martyrem & veritatis confessorem beatum ac sanctum prædicans, qui partem ἐν τῇ ἀνάστασι τῇ πρώτῃ, in ista resurrectione prima, de qua sc. in antecedentibus actum est, habet, sive cujus anima cœlestis gloriæ particeps facta est. Causam quoque, cur in prima resurrectione partem habentes beatos prædicet, addit, quia *super illis mors secunda non habet potestatem, sed*

erunt sacerdotes Dei & Christi, & regnabunt cum illo. Per mortem secundam, qua phrasi solus Johannes utitur, metaphorice damnatio æterna intelligitur, uti constat ex Apoc. II, v. 11. Cap. XX, v. 14. Cap. XXI, v. 8. Sicuti enim homines per primam ac temporalem mortem, cui omnes propter peccata subiecti sunt, Rom. V, v. 12. Hebr. IX, v. 27. naturali privantur vita, illorumque animæ suis a corporibus separantur; ita impii per secundam mortem æterna vita ac cœlesti gloria privantur, & a divini confortii fruitione segregantur. Spiritus S. autem non omnes, qui spiritualiter a peccatis resurrexerunt, beatos ac sanctos prædicare possêt, ita ut partem in vita æterna haberent, quia multi *πρόσκαρποι*, in proæretica peccata relabentes, inque illis ex hac vita discedentes, dantur, in quos mors secunda omnino potestatem habet. Hinc non de spirituali resurrectione ad vitam gratiæ, multo minus de corporali hominis è sepulchro, sed de resurrectione & ascensione animarum ad vitam gloriæ, h. l. est sermo. Suffragatur nobis Ambrosius, in hunc locum scribens: *Sed quia dicit, sc. Johannes, beatos esse eos, qui habent partem in resurrectione prima, non mihi de baptismo hoc dictum videtur, eo quod non omnes beati sint, qui per baptismum a morte animæ resurgere videntur.* Hinc Spiritus S. animas martyrum ac confessorum, in vitam æternam translatis, beatas prædicat, cum secundæ vel æternæ morti non subiectæ, sed ab hac in omnem æternitatem liberæ sint. Beati quoque martyres prædicantur, quia sacerdotes Dei erunt, & cum Christo regnabunt. Regnare cum Christo idem est, ac in regno gloriæ cœlesti honore frui, uti v. antec. 4. ostensum. Sacerdotem Dei & Christi in cœlis esse, nihil aliud denotat, quam Deo perfectissime servire in perfecta iustitia & sanctitate, illumque celebrare & honorare, confer Apoc. VII, v. 9. seqq. Beati enim in vita æterna Deo continua sacrificia laudis, gratiarum actionis ac perpetui obsequii ferent. Ex collatione itaque v. 4. 5. & 6. satis clarum est, statum gloriosum animarum martyrum depingi, quo intra spatium temporis, in quo ecclesiæ militanti in terris halcyonia concessa sunt, fruuntur. Cum etiam secunda mors vitæ gloriæ siue resurrectioni primæ ad vitam privative opponatur, quis dubitare potest, hanc resurrectionem primam esse æternæ vitæ fruitionem? Nam mors secunda neque est corporalis, neque spiritualis, sed æterna, siue translatio impiorum in infernum, ergo resurrectio quoque prima, cui hæc mors opponitur, neque est corporalis, neque spiritualis, sed æterna, siue translatio animarum piorum in vitam æternam. Nominatur translatio animarum ad beatitudinem resurrectio prima, ad differentiam secundæ, quæ fit die extremo,

mo, & est translatio totius hominis in gloriam cœlestem, de qua ipse Christus: *qui bona fecerunt, in resurrectionem vitæ* sive ad translationem ad vitam gloriæ. Joh. V, v. 29.

§. 17.

Sicuti autem de beate demortuis martyribus ac confessoribus, quod in cœlis gloriose viverent, cumque Christo regnarent, & æterna beatitudine fruerentur, Spiritus Sanctus testatus est, quam animarum translationem ad gloriam metaphorice nominaverat primam resurrectionem; ita è contrario de non beate mortuis, qui Paganismo, Muhammedismo vel Papismo usque ad finem vitæ adhæserunt, & in peccatis ac incredulitate è vivis discesserunt, testatur, illos non revixisse, neque illorum animas post solutionem a corporibus in vitam æternam translatas ac cœlesti gloria frui esse, sed hac caruisse, inque inferno ac miserrimo statu in æternum mansisse, confer Psalm. XLIX, v. 15. Luc. XVI, v. 26. Sicuti autem omnia ferme hoc in textu sunt allegorica, ita etiam non reviviscentia impiorum, resurrectioni piorum primæ opposita, allegorice accipienda est. Nec huic explicationi de non reviviscentia damnatorum obstat, quod additur: non revixerunt, donec τὰ χίλια ἔτη, illi mille anni, sc. visionales, consummarentur: sensus enim non est, ac si damnati post mille annos. spem æternam vitam ingrediendi haberent, sed potius, quod illos æterna a vita regnoque gloriæ in æternum alienos, ac cœlesti beatitudine exclusos manere oporteret. Sic particula donec negative pro nunquam sumitur, 1. Sam. XV. v. 35. 2. Sam. VI. v. 23. Ps. CXII. v. 8. Es. XXII. v. 14. ut & in specie particula ἕως in textu occurrens v. gr. Matth. I. v. 25. Cap. V. v. 25. Cap. XVIII. v. 34. inque aliis locis, vide Glasf. Philol. S. libr. 3. tract. 5. Can. 12. pag. 706. 707.

§. 18.

Ultima circumstantia hic consideranda, est tempus durationis, quamdiu sc. pii martyres & confessores in cœlesti gloria vivant, ac cum Christo regnent, respondet Johannes: χίλια ἔτη *mille annos*, in quibus nempe diabolus ligatus, & ecclesiæ militanti in terris halcyonia a DEO concessa sunt. Verum enim verò hi mille anni inclusive, incluso sc. sequenti tempore, non exclusive accipi debent, ac si, impletis his mille annis, non amplius martyres in cœlesti ac glorioso statu viverent, cum unius positio non statim sit alterius exclusio, sed reliquum tempus ad diem usque extremum simul includatur. Die enim extremo animæ martyrum & confessorum a Johanne visæ cum suis corporibus unientur, ac sic totum compositum cum Christo in cœlesti gloria

omnem in æternitatem regnabit. Apoc. XXII. v. 5. Matth. XXV. v. 46. Paulus de Christo quoque dicit: *oportet istum regnare, donec posuerit hostes suos sub pedes suos*, 1. Cor. XV. v. 25. propterea autem istum, hostibus suis sibi subjectis, non amplius regnaturum esse, haud negat. Sic quoque Matth. XXVIII. v. 20. *Ecce, ego vobiscum sumusque ad consummationem seculi*. Status igitur h. l. gloriosus ac felix, quo intra hoc tempus, Satana ligato, animæ martyrum ac confessorum veritatis in cœlis fruuntur, tantum describitur, reliquo tempore autem, quo in cœlesti gloria adhuc vivunt, & in posterum vivent, non excluso. Si v. gr. amico, alium in locum proficiscenti, quis dicit: totum annum bene vivas, donec redeas: reliquos annos sane post ejus reditum non excludit, ac si in istis non bene vivere debeat, sed simul includit. Ita quoque h. l. accipitur, ac sensus est: martyres non solum cum Christo mille annos, Satana ligato, regnant, cœlestique honore fruuntur, sed & consummatis illis mille annis, ac soluto diabolo, imo in omnem æternitatem gloriose vivent, ac cœleste regnum possidebunt. Dan. VII. v. 18. Hæc est secunda pars visionis Johannæ ejusque genuina interpretatio, ac verus & uti firmiter persuasi sumus, a DEO intentus sensus.

CAPUT IV. PORISMATICUM.

De confectariis ex hoc textu rite explicato fluentibus.

CUm textus biblicus non solum in hunc finem hermenevtice tractandus, ut de genuino ejus sensu constet, sed & ut sensus verus investigatus in usum ecclesiæ applicetur; hinc ex nostro textu rite explicato quoque porismata sive confectaria sunt elicienda. Potiōra autem exinde fluentia sunt sequentia:

I. PORISMA. Chiliastarum opinio in hoc textu plane nullum habet fundamentum.

Chiliastarum error, ex erronea hujus loci expositione ortus, de visibili Christi regno, quod in his terris incepturus sit, in fumum abit, cum ejusmodi regni terreni, ex cerebro Chiliastarum ficti, nullam Johannes mentionem faciat, neque etiam hoc regnum post piorum mortuorum resurrectionem ad hanc vitam, sub finem mundi expectandum esse, asserat. Refert quidem Johannes, sibi in priori textus parte statum felicem ecclesiæ militantis repræ-

sentatum

sentatum fuisse, quem Christus ecclesiæ, ne tyranni & hostes hanc amplius tam crudeliter persequerentur, per certum temporis intervallum concedere vellet; sed nihil percipio de regno mundano, variis deliciis, vel corporalibus, vel spiritualibus repleto, sub finem mundi a Christo in his terris inchoando. Pergit Johannes narrare, sibi in posteriori textus parte sub imagine ostensum fuisse statum ecclesiæ triumphantis gloriosum in cœlis, in quo animæ martyrum statim post discessum a corporibus suis cœlesti gloria & honore in vita æterna fruituri sint; sed nihil percipio de resurrectione corporum ad hanc vitam, & regnum mundanum chiliaisticum, nihil quoque de oppressione omnium impiorum in hoc regno, quæ omnia tamen jactitant Anabapt. Weigel. & Quack. vide B. Olear. Syn. Err. Fanat. pag. 68. Quis igitur unicuique vestigium de chiliastarum regno mundano h. l. invenire potest? Hoc regnum expectandum, est suave sed inane Chiliastarum ac Fanaticorum somnium, nec in Scriptura S. sed in illorum cerebro reperitur. Si hi mille anni nondum inchoati, sed adhuc expectandi essent juxta Chiliastas, sequeretur, mundum ultra mille annos adhuc duraturum esse: quod posterius autem absurdum.

II. P O R. Diabolus ecclesiæ infensissimus hostis est, illamque vario modo affligit.

Est enim serpens antiquus, qui protoplastos, illis felicitatem, in qua creati, invidens, seduxit, seductosque simul cum omnibus eorum posteris summam in miseriam animarum & corporum præcipitavit. Ex odio enim inveterato tyrannos ad ecclesiam persequendam instigare solet. Imo sicut leorugiens adhuc circumit, fraudulentia ac violentia temporalem & æternam salutem hominibus auferre conatur, & præsertim piis vario modo infidiatur. 1. Petr. V. v. 8. Apoc. XII. v. 12. 13. Quis Pharaonem ad opprimendos Israelitas instigavit, nisi diabolus?

III. P O R. Potentia diaboli non est absoluta, sed limitata & circumscripta.

Diabolo h. l. a Christo non concedebatur, ut pro voluntate sua amplius gentes seduceret, sed in abyssum conjiciebatur. Conatus ejus quidem est, corporibus ac animabus piorum nocere, totamque ecclesiam perdere, sed potentia ac malitia illius a Deo certi fines ac limites positi sunt, quos transgredi haud debet, licet ardentissimo hominibus nocendi odio flagret. Constat hoc ex historia Jobi, certe ipsi non licuit pro lubitu cum Jobo agere, sed quantum

quantum isti a Deo concessum fuerit. Cap. I. & II. Non quoque licuit ipsi in porcos intrare, eosque in mare præcipitare, antequam a Christo veniam impetravit. Matth. VIII. v. 31. 32. Hinc diaboli & potestas, & potentia, est coarctata, a concessione divina unice dependens. Unde recte Gregorius lib. 2. Moral. scribit: *a se ipso habet diabolus nocendi voluntatem, sed a Domino potestatem: quod enim ipse facere inique appetit, Deus fieri non nisi juste permittit.*

IV. P O R. Diabolus in organis suis, impiis hominibus, efficaciter operatur.

Sicuti enim gentes seduxit, & ad varia mala, ut sibi obedirent, suamque voluntatem implerent, excitavit; Ita quoque impiorum animos ad multa atrociora peccata, mox malas cogitationes illis ingerendo, mox occasionem mala faciendi præbendo, mox eorum cor efficaciter obdurando, mox etiam illos ad desperationem incitando flectit. *Deus seculi hujus sensus infidelium excæcare solet, ne illis illuminatio evangelii splendeat.* 2. Cor. IV. v. 4. *Operatur in filiis incredulitatis.* Eph. II. v. 2. Nonne diabolus in cor Judæ Simonis Ischariothæ injiciebat, ut Christum proderet? Joh. XIII. v. 2. Hinc Sadducæi angelos bonos ac malos esse negantes, valde errant. Act. XXIII. v. 18. Sic quoque Manichæi, qui diabolos pro motibus tristibus tantum olim habuerunt, illos autem esse *ὁφθαλμοὶ* inficiati sunt. Vide B. Scherz. Syst. Th. pag. 96. Sed ex malis operibus diabolorum satis elucescit, hos esse proprias subsistencias.

V. P O R. Diabolus homines ad varia diffidia ac noxia bella gerenda excitat.

Nonne diabolus Ethnicos imperatores ac Saracenos seducens ad horrenda bella ecclesiæ immissa instigavit? Cum diabolus dissidiis ac rixis hominum delectetur, eorumque interitum cum temporalem, tum æternum avidè quærat, hinc varia diffidia inter illos disseminat, ut alter alteri invidens, damnum inferre conetur. Præsertim potentibus regibus ac principibus inquietas cogitationes ingerendo, illos ad noxia & diuturna bella excitat. Nonne diabolus regem Ahabum ad noxium bellum permissu Dei instigabat, in quo rex ipse vulneratus morte violenta obiit? 1. Reg. XXI. Experti quoque majores nostri ferociam diabolicam in bello germanico, in quo multi ac innumeri homines exspoliati ac trucidati sunt.

VI. P O R. Christus est omnipotens Deus, qui in diabolum & omnes creaturas absolutam potestatem habet.

Nonne

Nonne angelus Christum repræsentans, clavem abyssi habens, magnamque catenam in manu tenens, draconem apprehendit & ligat, ejusque furorem ac sævitiam frænat ac cohibet? Christo enim non solum secundum divinam, sed etiam humanam naturam infinita potentia & potestas competit, sese ad omnes creaturas, visibiles ac invisibiles extendens, quam posteriorem Calviniani v. gr. Beza, Zanchius, Massonius, Sohnius, Altingius, Piscator, Ursinus, Wendelinus, Bergius, Polanus, & alii, vide B. Olear. Syn. Error. Calv. p. 33. & Pontificii, Bellarminus, Becanus, Tannerus, Gregorius de Valentia, Gretserus, aliique inficiantur, vide ejusdem Syn. Err. Pontif. pag. 13. It. Quenst. Syst. Th. P. III. pag. 168. Scherz, Coll. Anti-Calv. pag. 190. & 198. ut & Brochm. Syst. Theol. P. I. pag. 788. concedunt autem potentiam creatam & finitam. Sed Christus ipse illis contradicens dicit: *Data est mihi omnis potestas in cælo & in terra*, Matth. XXVIII. v. 18. *Habeo claves inferni & mortis*. Apoc. I. v. 18. *Data est filio hominis potestas æterna*. Dan. VII. v. 14. Propterea nominatur *Rex regum, & Dominus dominorum*. Apoc. XIX. v. 16. De isto David dicit: *magnus JEHOVAH, & Dominus noster præ omnibus diis, omne, quod vult JEHOVAH, facit in cælis & in terra, in maribus & omnibus abyssis*. Pf. CXXXV. v. 5. 6. Omnia in mundo regit ac gubernat, omnia sustentat, omnia ipsi ac potestati ejus subjecta sunt. *JEHOVAH occidit & vivificat, descendere facit in infernum, & ascendere facit*. 1. Sam. II. v. 6.

VII. P O R. Quælibet res certam, ac divinitus constitutam temporis periodum habet.

Datur enim tempus a Deo constitutum, in quo Satanas tam per mille annos, ne amplius pro lubitu ecclesiæ nocere possit, ligatur, quam iterum solvitur. Sic Deus cuilibet rei certam temporis periodum ordinat, quam nemo impedire potest, a Deo constituto termino autem impleto, res rursus mutatur. *Ipsæ mutat tempora & momenta, deturbat reges, & excitat reges*. Dan. II. v. 21. *Deus præfinit præordinata tempora, & limitum positionem habitationis hominum*. Act. XVII. v. 26. Hinc vicissitudo temporum in vita humana ex ordinatione vel permissione divina semper datur, ita ut jam huic hoc, illi aliud per certam temporis periodum contingat, hac autem absoluta, tota rei facies mutatur. Hæc vicissitudo ex historia Josephi ac Jobi luculenter apparet. Salomo dicit: *omnibus tempus est, & tempus omni voluntati sub sole. Tempus ad plorandum, & tempus ad ridendum*. Eccl. III. v. 1. 4. Deus septuaginta annos constituerat, in quibus Judæi in captivitate Babylonica commorari debebant. Jer. XXIX. v. 10. Errarunt igitur gentiles Philosophi, Protagoras, Democritus, Epicurus, Plinius & alii, qui Deo omnem curam ac

providentiam circa mundi inferiora derogarunt: ut & Stoici omnes temporum vicissitudines fato adscribentes. vid. Scherz. Syst. Th. pag. 125. & Quenst. Syst. Part. I. pag. 537.

VIII. P O R. Ecclesiæ a Deo nonnunquam halcyonia, quo in pace ac quiete vitam suam agere queat, conceduntur.

Cur angelus Christum adumbrans draconem ligatum in abyssum conjiciebat, nonne hoc, ne gentes amplius ad ecclesiam persequendam seduceret, faciebat? Deus enim est iste, qui terræ habitatoribus, ob commissa peccata proæretica, bellum immittendo, hostibus permittit, ut istos spolient, denuident, & omnia ab illis auferant. Inde Deus dicit: *Quis dedit in prædam Jacobum, & Israelem spoliantibus? Nonne Jehovah, cui peccavimus?* Es. XLII, v. 24. Est etiam iste, qui halcyonia & pacem largitur. *Ego Jehovah, & non præterea: formans lucem & creans tenebras, faciens pacem & creans malum, ego Jehovah faciens omnia hæc.* Cap. XLV, v. 6, 7. *Dabo pacem in terra, ita ut secure cubetis, & non sit per te terra faciens.* Lev. XXVI, v. 6. Quoties, & quamdiu Deus ecclesiæ Israeliticæ nonnunquam pacem concesserit, ex historia Judicum & Regum constat.

IX. P O R. Omni tempore constantes veritatis confesso- res, qui idololatriæ falsæque Anti Christi doctrinæ haud fuerunt addicti, vixerunt.

In textu etiam eorum, qui bestiam non adoraverant, neque imaginem ejus acceperant, mentio fit. Constantia enim in evangelica veritate ac fide ad salutem consequendam requiritur. *Quisquis perseveraverit ad finem, servabitur.* Matth. X, v. 22. Hinc veri Christiani semper de Christo, Servatore suo, testimonium aperte & ingenue coram hominibus, hoc postulantibus, perhibentes, doctrinæ ejus firmiter adhærent, idololatricæ vero doctrinæ Papæ & aliorum hæreticorum contradicunt. Ita sancti Apostoli intrepide de Christo ejusque doctrina testati sunt. Act. V, v. 29 - 32. Nonne beatus Lutherus Wormatiæ in comitiis, in conspectu Cæsaris & statuum imperii Romani, publicum testimonium de Christo & evangelica doctrina publice edidit? Imo nullo non tempore, ab initio ecclesiæ fundatæ, fuerunt quidam religioni veræ adhærentes, falsæ vero contradicentes. Hinc Syncretistæ erant, religionis mixturam in ecclesiam introducere laborantes, ut & Armini- ani, Episcopius, Curcellæus, Limborchius & alii, omnes cujusvis religionis, si modo symbolum apostolicum suscipiant, vitamque præceptis Christi conformem agant, pro membris veræ ecclesiæ agnoscentes, vide B. Olear. Syn.

Err. Arm. pag. 5. 6. Sed Syncretismus repugnat divino mandato. 2. Cor. VI, v. 14. Apoc. III, v. 15. Syncretismus Samaritanismum divinitus prohibitum introducit. 2. Reg. XVII, v. 34. omnemque religionis ac pietatis Zelum extinguit, ut bene monet B. Gerhard. L. Theol. Tom. VI. de Magistr. §. 200. pag. 855.

X. POR. Veri Christiani multa adversa ob nomen Christi ejusque evangelium patiuntur, imo nonnunquam Martyres fiunt.

Johannes in textu animas securi percussorum propter testimonium JESU, & propter verbum Dei videbat. Talem fortem veri Christiani omni tempore experti sunt, imo adhuc experiuntur. Christus de Paulo dicebat: *ego monstrabo illi, quanta oporteat illum pro nomine meo pati.* Act. IX, v. 16. Ut & de omnibus suis apostolis: *alienos a synagogis facient vos: imo venit hora, ut omnis, qui occiderit vos, putet, cultum sacrum Deo offerre.* Joh. XVI, v. 2. Nonne quoque omnes apostoli, excepto Johanne, ob nomen Christi & evangelicam doctrinam martyres facti, & violenta morte obierunt? *Nam per multas afflictiones oportet ingredi in regnum Dei.* Act. XIV, v. 22. Hinc Bellarminus valde errat, inter notas veræ ecclesiæ externam & temporalem felicitatem referens. Bellarm. lib. IV. de Eccl. cap. 3. seqq. Impii in hoc mundo plerumque sunt felices. Jer. XII, v. 1. Ps. LXXIII, v. 3. 4. 5. Pii vero variis afflictionibus ac persecutionibus obnoxii, quod omnium fere temporum exempla comprobant.

XI. POR. Viris Θεοπνεύστοις multæ & arduæ res, bonæ ac malæ, a Deo manifestatæ sunt.

Deus Johanni in quadam visione futurum statum ecclesiæ militantis in terris, & triumphantis in cœlis manifestavit. *Sicuti multis vicibus, multisque modis olim Deus locutus patribus in prophetis;* Ebr. I, v. 1. Ita quoque in N. T. suam voluntatem vario modo significavit atque revelavit, mox per immediatam inspirationem, mox per externum alloquium. Placuit etiam Deo res arduas sanctis prophetis & apostolis sub involucribus, in ænigmatibus ac visionibus divinitus immixtis, revelare, & ante eorum oculos ponere, quo illas hominibus denunciarent. Sic Deus Danieli per quatuor bestias, e mari ascendentes, ænigmatice quatuor magna regna in terris futura præfigurabat. Dan. VII. Petro quoque per quadrupedia terræ animalia invase, ex aperto cœlo in terram demisso, existentia, & a se munda reputata, Deus aperit, quod etiam poenitens ethnicus Cornelius & alii a se mundi censerentur, licet a Petro immundi & profani pronunciarentur, Act. X, v. 9 - 16. Errant autem Fanatici, A-

nabaptistæ, Donatistæ, Weigeliani, Schwenckfeldistæ & alii post mortem Apostolorum, præter revelationes viris Θεωρευοίς factas, inque verbo Dei comprehensas, varias privatas revelationes, apparitiones & visiones jactantes. vid. B. Olear. Syn. Err. Fanat. pag. 6. 7. & Quenst. Syst. Th. P. I. p. 48. 49. Quas visiones privatas solide refutavit Magnif. Dn. D. Valent. Ernest. Lœsch. in disput. de visionibus & revelationibus 1692. Witteb. habita. ut & B. Johan. Meisn. in Tract. Theol. de Prophet. novis.

XII. POR. Visibilis in his terris ecclesia nunquam est pura, sed cœtus mixtus ex bonis ac malis.

Johanni tam tales, qui bestiam non adoraverant, quam qui doctrinæ Anti-Christianæ addicti fuerant, in visione repræsentabantur. Hinc Anabaptistæ, Donatistæ ac Weigeliani errant, ecclesiam visibilem ex solis sanctis constare autumantes. vid. B. Olear. Syn. Err. Fanat. pag. 53. 54. ut & Quenst. Syst. Th. P. IV. pag. 488. 489. Sed A. C. in Art. VIII. illis contradicit. In Ecclesia Corinthiaca non solum veri Christiani, sacra cœna digne utentes, sed & hypocritæ, hanc indigne usurpantes, reperiiebantur. 1. Cor. XI. Imo in Apostolico collegio Judas proditor Christi erat. Joh. XIII, v. 21. Sicuti in agro non tantum triticum, sed & zizania inveniuntur; quemadmodum quoque in sarena, in mare jacta, pisces boni & mali dantur; Matth. XIII. Ita etiam in externo ecclesiæ cœtu tam christiani, Christo sincere servientes & adhærentes, quam mali ac hypocritæ, speciem piæ vitæ externæ præbentes, virtutem ejus autem abnegantes, reperiuntur. 2. Tim. III, v. 5.

XIII. POR. Calamitates piorum tantum temporariæ sunt, nec semper durant.

Sic securi percussi propter testimonium JESU non semper in ærumnis manserunt, sed temporalem per mortem omnibus ex malis liberati sunt. Licet pii ob pietatem suam multis subjecti sint adversis, ac non raro æstum mundi, persecutiones ac varia mala pati necesse habeant, attamen illorum adversa non omni tempore durant, sed desinunt, vel adhuc in hac vita, uti ex Jobi historia elucescit, vel in beata eorum morte, in qua omnes calamitates ipsorum, in mundo remanentes, finem obtinent, quod beata pauperis Lazari mors comprobatur. Luc. XVI. Sicuti enim non semper ingrata hyems est, sed etiam ver sequitur amœnum; ita quoque pii non semper infelici in statu manent, sed & postea recreantur.

XIV. POR. Dantur tantum duo loca post mortem, ad quæ animæ hominum perveniunt.

Non-

Nonnulli enim homines vivebant ac regnabant cum Christo in vita æterna mille annos, nonnulli autem morti secundæ five æternæ subjecti erant. Hinc papistæ tertium locum, nempe purgatorium fingentes, valde errant: in specie Bellarm. L. I. de purgat. c. 6. Altum enim silentium in scriptura de purgatorio papistico est. Christus dicit: *qui crediderit & baptizatus fuerit, salvabitur: qui vero non crediderit, condemnabitur.* Marc. XVI, v. 16. Nullam vero mentionem tertii loci facit. Lazarus quoad animam deportabatur in sinum Abrahæ, divitis epulonis anima autem in infernum detrudebatur. Ergo purgatorium est figmentum papisticum.

XV. POR. Datur post hanc vitam alia vita beata & æterna.

Videbat enim Johannes beatos in cœlis vivere atque cum Christo regnare. Hanc vitam æternam Christus credentibus promisit: *ego vitam æternam do ovibus meis.* Joh. X, v. 28. Hanc vitam æternam Jobus non solum credebat, sed & expectabat. Job. XIX, v. 26. 27. Hanc Christus pœnitenti latroni his verbis pollicebatur: *Amen, dico tibi, hodie mecum eris in paradiso.* Luc. XXIII, v. 43. Hanc vitam Christus passione ac morte promeritus est: *Christus JESUS mortem abrogavit, in lucem autem produxit vitam & incorruptibilitatem.* 2. Tim. I, v. 10. *Nos Deus non posuit in iram, sed in possessionem salutis, per Dominum nostrum JESUM Christum, qui mortuus est pro nobis.* 1. Theff. V, v. 9. 10.

XVI. POR. Electi in vita æterna omni a malo sunt immunes, summaque gloria fruuntur.

Vivunt enim isti, ac cum Christo regnant, suntque beati, & super illos mors altera non habet potestatem. Animæ electorum sunt sanctæ, & a peccato, errore & anxietate immunes, corpora haud subjecta ærurnis, morbis aut morti, sed immortalia sunt. Totus homo in statu felicissimo, omnique lætitia & abundantia repleto, perpetuo versatur. *Deus ab oculis illorum absterget omnem lachrymam, & mors non erit amplius, neque luctus, neque clamor, neque labor erit amplius, quia priora transierunt.* Apoc. XXI, v. 4. Paulus dicit: *reposita est mihi corona justitiæ, quam dabit mihi dominus in illa die justus iudex, non tantum autem mihi, sed etiam omnibus, qui amant apparitionem ejus.* 2. Tim. IV, v. 8. *Justi fulgebunt ut sol in regno patris sui.* Matth. XIII, v. 43.

XVII. POR. Felicitas impiorum tantum temporaria, transitoria & vana est.

Reliqui mortuorum non revixerunt, neque æterna felicitate fructi sunt, licet in his terris ad tempus felicissimi fuerint. Felicitas impiorum non raro in hoc mundo in statum miserum mutatur, gaudium in tristitiam, honor in contemptum, dignitas in contumeliam. *Deus removet Dynastas a throno.* Luc. I, v. 52. David dicit: *inlubricis ponis eos, dejicis illos in vastitates. Quomodo facti sunt subito in vastitatem? perierunt & consumti sunt a terroribus.* Psalm. LXXIII, v. 18. 19. *Vidi impium violentum, & virescentem sicut laurum viridem, verum præterii, ecce non erat ille: quæsi quidem eum, sed non inventus est.* Psalm. XXXVII, v. 35. 36. Si quoque impiorum felicitas totam per vitam duraret, attamen in eorum infelici morte evanescit, & in statum horrendum mutatur. Hoc divitis epulonis exemplum comprobatur. Luc. XVI. *Quando ditiescet vir, & multiplicabitur gloria domus ejus, in morte sua non accipiet quicquam, non descendet post eum gloria illius, veniet ille ad generationem patrum illius, usque in æternum non videbit lucem.* Ps. XLIX, v. 17. 18. 20.

XVIII. POR. Datur omnino infernus & πῆρ damnatorum, ubi impii cruciantur.

Multi mortui non revixerunt, neque ad æternam gloriam translati sunt. Licet expectæ doctrinam de inferno ac damnatione æterna derideant ac despiciatui habeant, attamen de hac re non est dubitandum. David dicit: *damnati sicut pecus in inferno ponentur, mors pascet eos.* Psalm. XLIX, v. 15. Anima epulonis in infernum & πῆρ damnatorum præcipitabatur. Luc. XVI. Deus dicit: *Ignis accensus est in ira mea, & ardebit usque ad infernum infimum.* Deutr. XXXII, v. 22. In infernum igitur omnes increduli descendunt, qui, mediis salutis rejectis, in sua incredulitate & impietate usque ad finem vitæ perseverant. *Qui non crediderit, condemnabitur.* Marc. XVI, v. 16.

XIX. POR. Damnati post mortem in horrendo statu sunt.

Non enim est istis pars in vita æterna, sed potius altera mors in eos potestatem habet. A beatifica Dei visione damnati separantur, omnique bono privantur. *Non ingreditur in vitam æternam ullus immundus, & faciens abominationem & mendacium.* Apoc. XXI, v. 26. *Foris sunt canes, & incantatores, & scortatores, & homicide, & idololatræ, & omnis, qui amat & facit mendacium.* Cap. XXII, v. 15. Imo quoque tormenta horrenda patientur, & igne infernali in omnem æternitatem cruciabuntur. Dives epulo in inferno exclamat: *Crucior in hac flamma.* Luc. XVI, v. 24. *Vermis eorum*

rum non morietur, & ignis illorum non extinguetur, eruntque fastidium omni carni. Es. LXVI, v. 24. Fumus cruciatus eorum ascendit in secula seculorum, nec habent quietem diu noctuque. Apoc. XIV, v. 11.

XX. POR. Non datur ante diem extremum corporalis resurrectio piorum particularis, sed die extremo demum eorum resurrectio in universali omnium mortuorum sequetur.

In textu enim de corporali resurrectione ad hanc vitam, ad quam Chiliastæ h. l. provocant, non est sermo, sed de plane peculiari, nempe de translatione & ascensione animarum martyrum cœlestem in gloriam; vide supra cap. III. Resurrectio piorum & impiorum in fine mundi, Christo ad iudicium venturo, simul fieri debet: ergo non datur particularis resurrectio piorum ante finem mundi. *Multi de dormientibus in pulvere terræ evigilabunt, quidam ad vitam æternam, reliqui vero in opprobrium & ignominiam æternam. Dan. XII, v. 2. Venit hora, in qua omnes, qui in monumentis, audient vocem filii hominis, & exhibunt: qui bona fecerunt, in resurrectionem vitæ, qui vero mala fecerunt, in resurrectionem iudicii. Joh. V, v. 28: 29. Imo Johannes ipse in eodem Cap. XX, v. 11 - 15. testatur, resurrectionem piorum & impiorum post consummationem mille illorum annorum, in quibus Satanas ligatus, & animæ martyrum vixerunt, cumque Christo regnarunt, demum die extremo & in fine mundi fore. Corporalis resurrectio quoque animabus a corporibus separatis, & in cœlesti gloria viventibus, quamdiu in cœlis separatæ vivunt, attribui non potest, sed corporibus competit; ἀνάστασις autem in textu non occisorum corporibus in terra jacentibus, sed istorum animabus, a corporibus suis per occisionem ac mortem solutis, tribuitur: ergo non proprie sed metaphorice sumitur. Et licet Chiliastæ ad Apoc. II, v. 8. provocantes objiciant, ἐζήσαν vixerunt h. l. idem esse ac ἀνέζησαν vivificati sive resuscitati sunt: attamen ibi non de Christi resuscitatione, sed de ejus perenni, majestatica ac gloriosa vita sermo est, confer. Apoc. I, v. 18. Deinde ἀνέζησαν non passive reddi debet: vivificati sunt, sed uti simplex, ἐζήσαν vixerunt, confer. Luc. XV, v. 32. Rom. XIV, v. 9. Quod nonnunquam compositum pro simplici verbo usurpetur: v. gr. ἀπολέλυσε pro λέλυσε, ἀνέβλεψε pro ἔβλεψε. &c. probat B. Glas. in Phil. S. libr. 3. tr. 3. can. 1. pag. 229. ita quoque h. l. ἀνέζησαν pro ἐζήσαν. Sic fane vana Chiliastarum ac Fanaticorum spes de aliquo regno Christi mundano, sub finem mundi in his terris certo expectando, plane evanescit ac in fumum abit, cum ejusmodi regnum mundanum non Christi, sed Chiliastarum phantasticum ac fictum sit. Nam nullum*

nullum regnum Christi est de hoc mundo, Joh. XVIII, v. 36. sed regnum Chiliastarum est regnum de hoc mundo : ergo regnum Chiliastarum non est regnum Christi, sed per consequens regnum phantasticum, & ex cerebro Chiliastarum profectum. Et sic Chiliasticæ opinioni, nostro textu Apocalyp- tico tanquam palmario nixæ, larvam detraximus, dum genuina nostra expositio hujus loci Chiliasmo crasso haud favet, (neque etiam subtili ac subtilissimo,) sed istum potius destruit, cum nullus plane ex hoc loco a nobis rite explicato stabi- liri queat. Non Chiliasmus crassus, cum nulla resurrectionis corporalis in hoc dicto fiat mentio, animæ enim martyrum, quia non mortuæ sunt, ad hanc quo- que vitam corporaliter resurgere nequeunt ; Non subtilis, quia millenarium regnum mundanum sub finem mundi a Christo inchoandum in textu haud traditur ; Neque etiam subtilissimus consistens in spe meliorum temporum, ex universali Judæorum & gentilium conversione promanante, summam ec- clesiæ ante finem mundi felicitatem continentium, quæ autem Johanni in vi- sione non præfigurata, sed conditioni regni Christi in his terris, quia cum tem- porali felicitate in scriptura nunquam conjungitur, potius est adversa. Vide B. Gerh. citato loco. Quod etiam regnum Chiliaisticum non solum sit ἀ- γραφον, sed & ἀντίγραφον, multos articulos fidei destruens, vide prolixè de hac re differentem B. Gerhardum in L. Theol. T. IX. de Consumm. Seculi §. 80. seqq. pag. 463. seqq. ut & B. D. Casparis Lœscheri disp. de Chiliasm. Wit- teb. 1712. habitam. Ac B. Neumanni disp. de Chil. subtiliss. Witteb. 1715. propositam. Nostri instituti exegetici ratio non fert, ut, fulcro regni Chi- liaistici, visioni Johannæ innixi, diruto atque destructo, ulterius progredia- mur, sed potius ut nostræ dissertationi finem imponamus, Deoque gra- tias pro assistentia ejus humillimo animo agamus dicentes :

SOLI DEO GLORIA.

